

四庫全書考證

一〇

舊



叢書集成

初編




商務印書館發行

國家圖書館典藏
由國家圖書館數位化

四庫全書考證

(十)



082.47
8437
10

四庫全書考證卷二十四

史部

史記下



四庫全書考證 卷二十四

九一九

007480



007480

史記下

卷四十二

鄭世家始朝周桓王。索隱桓王卽位。刊本王訛公。據左傳杜注改。又子憚立。是爲釐公。索隱左傳作髡。頑。刊本頑作原。案此字公羊穀梁作原。左傳作頑。今據改。又鄭相子產卒。正義子產墓在潁水上。刊本潁訛涇。據水經注改。又敗韓兵於負黍。正義故周邑也。刊本周訛國。據秦本紀正義改。敗秦兵於汪。考證汪疑彭衙之誤。案左傳文公二年春二月甲子。晉及秦師戰于彭衙。是年冬晉先且居。鄭公子歸生伐秦。取汪及彭衙而還。此鄭穆公之三年也。傳與史合。此汪字不誤。

卷四十三

趙世家將以其冑女孟姚配而七世之孫。索隱卽娃嬴吳廣之女。刊本娃訛姓。據毛本改。又徐越爲內史。正義少府內史。周官案此釋內史不當及少府。少府二字衍。又侵齊至長城。正義齊長城西頭在濟州平陰縣。刊本濟訛齊。據楚世家正義及唐書地理志改。又與燕會阿。正義以徐兗二水並過其西。案水經注兗當作滌。又燕趙卽此地。案文義燕下當有會字。又起壽陵。集解徐廣云。在常山。刊本山訛州。今改。又築長城。正義疑此長城在潭水之北。趙南界。案趙南界無潭水。此潭字疑漳字之誤。又十年秦取我中都及西陽。刊本中字西字互訛。據本註及六國表改。又命乎命乎。正義重言

命乎者以談說衆也。刊本乎訛呼。今改。又孟姚也。索隱舜後封虞。刊本舜訛然。今改。又王出九門。正義戰國策云。本有宮室而居。案今戰國策無此語。又爲野臺。正義在定州樂縣西南六十三里。據唐地理志。樂上當有新字。又西有林胡樓煩。正義七國時趙邊邑也。刊本邊邑二字互倒。又並爲趙西境也。刊本並爲二字互倒。今並改。又趙希并將胡代趙與之陘。正義與音余。刊本余訛與。據淮陰侯傳注改。又在并州井陘縣東南十八里。刊本脫并字。據唐書地理志增。又與秦會中陽。正義在汾州隰城縣南。刊本隰訛偃。據唐書地理志改。又虜卿秦樂間。正義皆燕將姓名也。刊本脫名字。今增。又拔武遂方城。正義方城在幽州固安縣南十七里。刊本在上衍故字。據通鑑集覽引括地志刪。又封長安君以饒。正義明長安君是號也。刊本君訛縣。今改。

卷四十四

魏世家三十八年。伐秦。敗我武下。正義故武城一名武平城。刊本武下衍之字。據秦本紀注刪。又齊敗我觀。正義國語注刊本注訛云。又敗於馬陵。正義澗谷深峻。刊本澗訛間。今並改。又五年。秦敗我龍賈軍四萬五千於雕陰。案五年表作二年。又魏伐楚。敗之陘山。正義陘山在鄭州新鄭縣西南三十里。刊本新下脫鄭字。據楚世家正義增。又秦拔我新垣曲陽之城。正義未詳端的所在之處也。刊本脫在字。今增。又不如用梟也。正義博骰有刻爲梟形者。刊本骰訛頭。據通鑑集覽引此文改。又決晉水以灌晉陽之城。正義趙襄子保晉陽。刊本保訛堡。據趙世家改。

卷四十五

韓世家。韓姬弑其君悼公。索隱。姬亦作玘。並音羊之反。案年表索隱作姬。一作跽。同音怡。兩處互異。又虜得韓將鯁申。差於濁澤。正義。齊潛王七年。敗魏趙觀澤。濁澤定誤矣。刊本趙觀澤三字。訛作世家云。據年表改。又與秦共攻楚。集解。徐廣曰。圍景座也。刊本座訛座。據年表改。

卷四十六

田敬仲完世家。幸得免負擔。刊本擔訛檐。據左傳改。又田常兄弟四人。乘如公宮。案齊世家無人字。又伐晉毀黃城。正義。故黃城在魏州冠氏縣南十里。刊本冠訛寇。據唐書地理志改。又伐魯葛及安陵。案年表作伐魯莒及南陽。又取魯之郈。正義。郈魯孟氏邑是也。刊本孟下脫氏字。今增。又晉伐我。至博陵。案博年表作鱗。又昔日趙攻甄。正義。北合在卽墨字上也。案此八字與本文全不相比。疑他處訛衍在此。

卷四十七

孔子世家。齊大夫犁鉏。案犁鉏。左傳作犁彌。又將適陳過匡。正義。故匡城在渭州匡城縣西南十里。刊本脫下匡字。據唐書地理志增。又而聞竇鳴犢舜華之死也。集解。又作竇犢鳴犢舜華也。刊本脫犢字。與本文同。今據家語增。又擾而不輟。集解。不以津告也。刊本也訛者。今改。又戰於郎。集解。哀公十年。孔子自陳至衛也。刊本陳字衛字互訛。據年表衛表改。

卷四十八

陳涉世家。然足下卜之鬼乎。集解。狐鳴祠中卽是也。刊本卽訛則。據漢書陳勝傳注改。又而遣故上谷卒史韓廣。刊本史訛使。據明監本改。又陽城人鄧說將兵居郟。正義。今汝州郟城縣是。刊本城縣二字互倒。據下文改。又臈月。索隱。二世二年十月。刊本脫二年兩字。據漢書注及本史表增。又宗懷荆楚記云。刊本懷訛稟。今改。又陳王故涓人。集解。涓人如謁者。刊本如訛知。據漢書應劭注改。又涉之爲王沈沈者。索隱。劉伯莊以沈沈爲談談。案談談疑潭潭之誤。韓愈集符讀書城南詩云。潭潭府中居。應本此。

卷四十九

外戚世家序及繼體守文之君。索隱。守文猶守法也。刊本文下行者字。猶下脫守字。今刪增。又周之興也。以姜原。索隱。是郤氏之女曰姜原。刊本氏訛女。今改。又春秋譏不親迎。索隱。公羊紀裂繻來逆女。按裂繻。公羊春秋作履綸。此誤。

封田蚡爲武安侯。索隱。在洛州武安縣西南七里。刊本洛訛洛。據唐書地理志改。

褚先生贊。出橫城門。正義。在雍州咸陽縣東南二十二里。刊本雍訛淮。今改。

武帝年七十乃生昭帝。索隱。此褚先生之誤。刊本誤訛記。據毛本改。

卷五十

楚元王世家。嫂詳爲羹。盡櫟釜。索隱謂以杓櫟釜旁使爲聲。刊本櫟訛歷。據史正文改。又都彭城。索隱東海彭城三十六縣也。刊本縣訛郡。據漢書改。又破棘壁。正義在宋州寧陵縣西七十里。卽梁棘壁也。刊本卽上衍州字。今刪。又子襄王經立案經年表作注。又邯鄲遂降。正義邯鄲洺州縣也。刊本洺訛洛。據唐書地理志改。

卷五十一

索隱述贊。王於彭城。刊本於訛失。據毛本改。

荆燕世家。澤使人謂田生曰。弗與矣。集解言不復與我爲友也。刊本友訛與。又文穎曰。不復與汝相知也。刊本復訛得。並據漢書注改。

卷五十二

齊悼惠王世家。又殺三趙王。正義梁王恢徙王趙。刊本下王字訛燕。據漢興以來諸侯年表改。又宦者徐甲。刊本脫徐字。據下文徐甲大窮句及漢書增。

卷五十三

蕭相國世家。何獨先入收秦丞相御史律令圖書藏之。刊本入訛人。據明監本改。又而發蹤指示獸處者人也。案蹤漢書作縱。顏師古曰。發縱謂解紿而放之。讀者乃爲蹤跡之蹤。非也。據彼說則此蹤字誤。

卷五十四

曹相國世家。攻定陶。取臨濟。正義。高苑縣西北二里有狄故城。刊本有訛北。今改。又雍。正義。括地志云云。案此段多訛脫。據唐書地理志及周秦本紀正義。當云。故雍城在岐州雍縣南七里。故釐城一名武功城。在雍州武功縣西南二十二里。古郃國也。又高祖三年。案漢書作二年。以下文魏王豹反及生得魏王豹事考之。高祖本紀在三年。月表禽豹在二年九月。淮陰侯列傳豹反在二年八月。此則與本紀同。蓋傳聞互異。故兩存之。

卷五十五

留侯世家。其先韓人也。正義。城父在汝州郟縣東三十里韓里也。案唐地理志。郟縣當作郟城縣。又韓里也里字。疑地字之訛。又東見倉海君正義。元年東夷濊君南閩等。案武帝本紀。元年前上當有元朔二字。又從容步游下邳圯上。索隱。文穎云。汜水上橋也。案漢書文穎注。汜作沂。又應劭云。汜水之上也。刊本汜訛圯。據下文及漢書注改。又鰕生。索隱。臣瓚案楚漢春秋。鰕生本姓解。案漢書臣瓚注。作楚漢春秋。鰕姓。疑此解字乃鰕字之訛。又放牛桃林之陰。索隱在弘農閩鄉南谷中。刊本訛作在農南門鄉谷中。據漢書注改。又及立蕭何相國。集解。良勸高祖立之。刊本脫良字。據漢書注增。

卷五十六

陳丞相世家。諸將盡謹。索隱。漢書作皆怨。案漢書作盡謹。與索隱所據本異。又左丞相不治。常給事於中。集解。不立治處。使止宮中也。刊本立訛在。使訛便。據漢書注改。又子簡侯恢代侯。案恢。功臣表作

惺。

卷五十七

絳侯周勃世家。夜襲取臨濟。攻張索隱。東郡壽良縣。刊本良訛。梁據漢書地理志改。又擊趙賁軍尸北。索隱。北謂尸鄉之北。刊本鄉訛縣。今改。又乃拜亞夫爲中尉。正義。中尉秦官。掌徼巡京師。刊本脫官字。據漢書百官公卿表增。又亞夫以中尉爲太尉。正義。百官表云。刊本表訛主。據漢書改。又景帝罵之曰。吾不用也。索隱。小顏以孟說爲得。刊本小訛大。檢漢書注。此顏師古語。非顏游秦語。作小顏爲是。今據改。

卷五十八

梁孝王世家。以武爲代王。正義。中都故城在汾州平遙縣西十二里。刊本遙訛通。據文帝紀正義及唐書地理志改。又而徙代王王清河。正義。清陽故城在貝州清陽縣西北八里。刊本脫陽字。據唐書地理志增。又迎梁王于闕下。案闕。漢書作關。疑此誤。又乃削梁八城。案八城。漢書作五縣。又梁餘尙有十城。案十。據漢書作八城。

卷五十九

五宗世家篇目。索隱。同母者爲宗也。刊本同訛司。今改。又彭祖立五十餘年。案五十。漢書作六十。又爲賈人權會。索隱。若今之和市矣。刊本和訛知。據漢書注改。又程姬有所避。不願進。索隱。脫袿裳。免

簪笄。刊本袿訛桂。今改。又故王后亦以妬媚不常侍病。索隱。鄒氏作媚。刊本媚訛媚。據毛本改。

卷六十

三王世家。昭六親之序。明天地之屬。刊本地訛施。據明監本改。

卷六十一

伯夷列傳。余以所聞由光義至高。索隱。卞隨自投于稠水。刊本稠訛桐。據莊子讓王篇改。又孤竹君之

二子也。索隱。叔齊名智字公達。案毛本智作致。又竟以壽終。集解。直農華陰縣潼鄉。刊本縣訛山。今

改。又賈子曰。索隱作鵬鳥賦。刊本鵬訛鵬。據賈誼傳改。又聖人作而萬物覩。正義。是周易乾象傳

辭也。刊本脫傳字。據周易增。又書以道事。刊本道訛導。據自序改。

卷六十二

管晏列傳。於柯之會。正義。今濟州東阿也。刊本阿訛河。據唐書地理志改。

卷六十三

老莊申韓列傳。於是老子迺著書。集解。著書九篇。名關尹子。刊本尹訛令。今改。又作漁父。盜跖。胠篋。索

隱。胠篋猶言開篋。刊本脫胠字。據毛本增。又無爲有國者所羈。正義。寧死爲留骨而貴乎。刊本死訛

無。據莊子秋水篇改。又申不害者京人也。正義。括地志云。京縣故城在鄭州滎陽縣東南二十里。刊

本括訛案。脫在鄭州滎陽五字。據項羽本紀正義改增。又韓非者韓之諸公子也。正義。九年虜王安。

韓遂亡。刊本遂訛非。據韓世家改。又悲廉直不容於邪枉之臣。索隱又悲姦邪諂諛之臣不容廉直之士。刊本悲訛非。今改。又汎濫博文正義。博文廣言句也。刊本文訛聞。據史本文改。

卷六十五

孫子吳起列傳。於是乃以田忌爲將而孫子爲師。案師齊田完世家作帥。又君若不引兵疾走大梁。索隱謂齊今引兵據大梁之衝。案史本文云。據其街路。此衝字當作街字。又大破梁軍。索隱計相去無十五歲也。刊本五訛三。據史正文改。又悼王旣葬。太子立。索隱肅王臧也。刊本臧訛賊。據毛本及世家年表改。

卷六十六

伍子胥列傳。楚昭王使公子囊瓦集解。此言公子又兼稱囊瓦。誤也。案春秋傳。子囊稱公子。子瓦係子囊孫。不稱公子。公子二字自是史記之誤。至子瓦稱囊瓦。乃以王父字爲氏。春秋傳及本書年表皆同。非以二人兼稱也。裴駟以是議史。殊爲失考。又封夫概於堂谿。正義今豫州吳房縣在州西北九十里。刊本脫房字。據唐書地理志增。又號爲白公。正義白亭在象州褒信縣南四十二里。刊本脫信縣二字。據楚世家正義及唐書地理志增。

卷六十七

仲尼弟子列傳。銅鞮伯華介山子。索隱家語又云。不克不忌。案此下一段。序伯夷叔齊及趙文子隨武子

之行。與本文不相蒙。檢毛本無之。此仍明監本誤衍。又瑚璉也。集解。夏曰瑚。殷曰璉。案禮明堂位作夏后氏之四璉。殷之六瑚。與此引論語包氏註異。又爲武城宰。正義。魯武城邑。刊本城邑二字互倒。今改。又子夏居西河教授。正義。在汾州隰城縣北四十里。刊本隰訛偃。據唐書地理志改。又宓不齊。正義。兗州永昌郡舊單父縣地也。東門有子賤碑。漢世所立。刊本脫昌字。門字漢字。並據顏氏家訓增。又誤爲宓。刊本宓訛密。下宓從音綿。句亦訛。並據史正文改。又子賤爲單父宰。正義。我之謂任人子之謂任力。刊本任俱訛在。據說苑政理篇改。又仁則吾弗知也。集解。未足以爲仁。刊本足訛知。據論語註改。

卷六十八

商君列傳。子觀我治秦也。刊本治訛視。據王鑿本改。

卷六十九

蘇秦列傳。東周雒陽人也。正義。蘇秦雒陽乘軒里人也。刊本乘軒里作軒里之。據趙國策改。又西有雲中九原。正義。九原郡城在榆林縣西界。刊本脫城字。今增。又南有噦沱易水。索隱。噦沱河自縣東至參合。刊本合訛谷。據漢書地理志改。又易水出易州易縣。刊本縣上脫易字。據唐書地理志增。又西迫強秦。正義。貝冀深趙四州七國時屬趙。刊本深訛燕。考地理志改。又奉陽君妬而君不任事。刊本而君二字互倒。據趙國策改。又劫韓包周。則趙氏自操兵。正義。趙邯鄲危。故須起兵自守。刊本危

字訛在須字下。今移正。又據衛取淇卷。集解卷丘權反。刊本丘訛兵。今改。又趙涉河博闕。案闕字。戰國策及張儀傳俱作闕。又昆陽召陵舞陽。集解。潁川有昆陽舞陽縣。刊本舞下脫陽字。據漢書地理志增。又禽夫差於干遂。正義。萬安山西南一里太湖。刊本訛作萬安山前遂。西南山太湖。據春申君傳正義改。又過衛陽晉之道。正義。陽晉故城在曹州乘氏縣西北三十七里。刊本脫城字。今增。又楚得枳而國亡。集解。秦拔楚鄢西陵。刊本脫西陵二字。據正義增。又齊得宋而國亡。正義。四十年五國共擊潛王。刊本四訛三。據年表改。又魏無虛頓丘。正義。今相州所理是頓丘故城。刊本丘訛州。今改。又致蘭離石。刊本脫離字。據戰國策增。又已得講于魏。刊本已訛趙。據國策改。

卷七十

張儀列傳。直蜀相攻擊。正義。因取直與巴焉。刊本訛作因滅巴蜀二郡。據華陽國志改。又巴子城在合州石鏡縣南五里。刊本鏡訛鏡。又塞斜谷之口。正義。洛州緱氏縣東南四十里。刊本緱訛維。並據唐書地理志改。又乃使勇士至宋。案至宋。楚本紀作宋遺。又不至十日。而距扞關。集解。巴郡魚復縣有扞水關。刊本脫縣字。水下衍扞字。據通鑑集覽引此注增刪。又作爲金斗。長其尾。索隱。若安長柄。則名爲料。刊本料訛杼。據毛本改。

卷七十一

樽里子甘茂列傳。智伯之伐仇西。正義。智伯欲伐仇西國。刊本脫仇字。據韓非子增。又甘茂至謂向壽。

曰案戰國策至下有魏字此脫。又魯人有與會參同姓名者案戰國策魯作費。又夫項橐生七歲爲孔子師案毛本索隱夫作大注云尊其道德故云大項橐各本大俱作夫或正義本與索隱異姑仍之。又索隱故云大項橐刊本脫大字據毛本改。

卷七十二

穰侯列傳守梁七仞之城集解駟案小爾雅曰刊本脫小字據小爾雅增。

卷七十三

白起王翦列傳燒夷陵正義夷陵今郟州郭下縣刊本郟訛破據唐書地理志改。又趙軍長平正義長平故城在澤州高平縣西二十一里刊本二十一訛作北一據元和郡縣志改。又南定鄆郢漢中正義鄆在襄州率道縣南九里刊本率訛夷。又漢中今梁州之地刊本梁訛襄並據元和郡縣志及唐書地理志改。又夫秦王怛而不信人刊本怛訛怛據王鑿本改。

卷七十四

孟子荀卿列傳倘亦有牛鼎之意乎索隱函牛之鼎刊本函訛涵據呂氏春秋及毛氏改。又楚有尸子長盧集解今案尸子書晉人也案漢書藝文志作魯人。

卷七十五

孟嘗君列傳而殺魏將龐涓索隱至三十六年改爲後元年刊本六訛一據魏世家索隱及竹書紀年改。

又會齊宣王東阿南正義東阿濟州縣也刊本濟訛齊據唐書地理志改。

卷七十六

平原君虞卿列傳乃穎脫而出索隱鄭玄曰穎環也刊本環字訛在鄭字上據禮記少儀注改。又是助秦自攻也刊本自訛目今改。

卷七十七

信陵君列傳平原君負鞬矢索隱如今之胡篋而短也刊本篋訛籠據毛本改。

卷七十八

春申君列傳王襟以東山之險刊本襟訛施據戰國策改。又齊右壤可拱手而取也正義謂濟州之南北也刊本濟訛渭考地理志改。又春申君因城故吳墟正義闔閭今蘇州也案句有脫漏當作闔閭所都今蘇州也。又又改破楚門爲昌門刊本改訛攻今改。

卷七十九

范雎蔡澤列傳先生待我于三亭之南正義蓋岡字誤爲南刊本字訛亭今改。又華陽君索隱華陽君芊戎刊本脫君字據史本文增。又于是范雎乃得見於離宮正義在雍州長安北三十里也刊本脫州字今增。又此所謂借賊兵齎盜糧者也索隱一作藉音亦同刊本音亦二字互倒今改。又則其國斷而爲三正義宜陽二刊本陽下衍今字今刪。又三歲不上計集解凡郡國治民進賢刊本國作

長今改。又睚眦之怒必報。索隱。睚眦。謂相噴而怒目切齒。刊本而怒目切齒。訛作怒而見齒也。據毛本改。又高平拔之正義。春秋時周桓王以與鄭。刊本春秋二字。訛作秦。今改。又令馬服子代廉頗。將索隱。號曰馬服者。言能服馬也。刊本號字。訛在上句也。字之上。脫能字。據毛本及趙世家索隱改增。太史公贊下。索隱。睚厄於魏。折脅摺齒。刊本魏訛齊。據本傳改。

卷八十一

廉頗藺相如列傳。大破之。取陽晉。刊本陽晉二字互倒。據索隱改。

卷八十二

田單列傳。贊夫始如處女。適人開戶。正義。易將及。劓卒燒壘墓。刊本劓訛被。據本傳改。

卷八十三

魯仲連鄒陽列傳。不肯仕宦任職。刊本宦訛官。據明監本改。又周烈王崩。正義。與徐不同。案上文云。烈王七年崩。齊威王之十年也。正與集解引徐廣語同。此云不同。疑徐廣語本有異。傳寫誤同耳。又故不敢入於鄒。刊本故訛固。據王鑿本改。又白虹貫日。索隱。聶政刺韓傀。刊本傀訛僕。據毛本及戰國策改。又昔卞和獻寶。索隱。成王名暉。刊本暉訛悼。據年表改。又王奢去齊之魏。集解。王奢齊臣也。刊本臣訛人。據漢書注改。又食以駃騠。索隱。馬父羸子。刊本羸訛羸。據匈奴傳改。又甯戚飯車下。牛索隱。斫者石淨貌也。刊本石訛自。據毛本改。又則士伏屍堀穴巖藪之中耳。刊本藪訛巖。今改。

卷八十四

屈原賈生列傳。大破楚師於丹浙。正義。丹陽今枝江故城。刊本枝訛岐。據後漢郡國志改。又懷王悔追張儀不及。刊本悔字訛在追字下。據明監本改。又豈足福哉。正義。豈足受福。刊本足訛是。今改。又何不隨其流而揚其波。索隱。楚詞隨其流作搢其泥也。案搢。楚詞今本作滛。與索隱所據本異。又傷懷永哀兮。汨徂南土。刊本永訛求。據楚詞改。又鳳凰在箴兮。正義。足履正尾繫武。刊本繫訛擊。據王鑿本改。又浩浩沅湘兮。正義。湘水出零陵縣陽海山北入江。刊本脫陽字。入江上行至字。據說文增改。又遂自投汨羅以死。正義。故羅縣城在岳州湘陰縣東北六十里。刊本湘訛相。據唐書地理志改。又獨與道息。索隱。不以心捐道。不以人助天。刊本捐道訛損。死人訛入。據莊子大宗師篇改。

卷八十五

呂不韋列傳。陽翟大賈人也。正義。陽翟今河南府縣。刊本縣訛也。今改。又此奇貨可居。正義。處於扇城。刊本扇訛聊。考戰國策高誘註。扇城。趙邑。吳師道注云。字書無扇字。龍龕手鑑音脚。今據改。又太子門下無貴者。案戰國策此句下有君之府藏珍珠寶玉八字。諸本皆脫。又楚有春申君。正義。孟嘗平原死稍在前。刊本平原訛春申。據年表及傳改。又遂遷太后於雍。索隱。遷太后榭陽宮。刊本榭訛滅。下句亦訛。據毛本及說苑漢書地理志改。

卷八十六

刺客列傳。聶政者。軹深井里人也。正義在懷州濟源縣南三十里。刊本州訛川。今改。又多人不能無生得失。索隱此云生得。言將多人往殺俠。累後有被生擒而事泄。刊本多人二字互倒。據毛本改。案史正文生得失。索隱作生得。以生擒解之。明唐時本無失字。此失字應是後人誤增。又故重自刑以絕從。正義其姊妄云爲已隱。誤矣。刊本復衍云字。今刪。又恣荆軻所欲以順適其意。索隱軻拾瓦投龜。太子捧金丸進之。刊本脫捧字。據明監本增。又將軍豈有意乎。刊本脫乎字。據明監本增。又設九賓。正義設文物大備。卽謂九賓。刊本文訛交。據蘭相如傳注改。又取舞陽所持地圖。刊本舞訛武。今改。又中銅柱。正義燕太子篇云。刊本脫篇字。今增。

卷八十七

李斯列傳。楚下蔡人也。索隱至昭侯徙下蔡。刊本下訛上。據地理志改。又以作注溉渠。正義自中山西邸瓠口爲渠。刊本脫中字。西字。瓠訛鄒。據河渠書及漢書溝洫志增改。又孝文用商鞅之法。案文字當作公。又今青臣等。案青臣卽上僕射周青臣。諸本訛作臣青。今改。又水搖動者萬物作。索隱水搖者。謂冰泮而搖動也。刊本冰泮訛水洋。據毛本改。

卷八十九

張耳陳餘列傳。頭會箕斂。集解家家人頭數。案漢書服虔注。作吏到其家。人人頭數出穀以箕斂之。又要之置廁。刊本脫廁字。據索隱增。

魏豹彭越列傳。彭越者昌邑人也。正義漢武更山陽爲昌邑國。刊本脫邑字。據漢書地理志增。又楚命蕭公角正義。蕭縣屬楚。刊本屬訛令。今改。

卷九十一

黥布列傳。布常爲軍鋒。索隱漢書作楚軍前簿。案今漢書作布爲前鋒。與索隱所據本異。當是漢書傳寫誤。又何爲廢上中計而出下計。刊本爲訛。謂據漢書改。又果如薛公籌。刊本如訛。加今改。又諸侯戰其地。案漢書戰上有自字。又以故長沙哀王集解。芮之孫回。刊本訛固。據漢書注及表改。太史公贊。妒媚生患。索隱媚是媚也。刊本媚訛媚。據毛本改。

卷九十二

淮陰侯列傳。齊趙亦反。漢與楚和。刊本亦訛。欲據下云擊趙代擊齊。則齊趙此時已反。漢和楚。不得言欲。據漢書改。又筭山而望趙車。案筭說文云蔽也。从竹卑聲。刊本筭訛革。考漢書亦訛。據索隱及說文改。又褸衣甘食。索隱漢書作靡衣媮食。刊本靡訛美。據毛本及漢書改。又醪兵。集解劉氏依劉逵作醪酒。案劉氏當作裴氏。指裴駟也。又與信夾濰水陣。索隱東北至都昌入海。刊本都昌二字互倒。據漢書地理志改。又爲百姓請命。正義士卒不死亡。故云請命。刊本不死亡作亡。故。又守儋石之祿者。集解石斗石也。刊本斗石二字互倒。並據漢書注改。又蒯通說不聽。索隱案漢書及戰國策刊

本書下衍因字今刪

卷九十三

韓王信盧綰列傳。國被邊。集解。被音被馬之被。刊本訛作被。音皮義反。據漢書及李奇注改。又漢封頽當爲弓高侯。索隱。功臣表屬營陵。刊本營訛榮。據湖書及表改。又陳豨者宛胸人也。索隱。屬濟陰。刊本濟訛齊。據漢書地理志改。又迺封豨爲列侯。集解。陳豨以特將將卒五百人。前元年從起宛胸至霸上爲侯。刊本脫一將字起字。據功臣侯表增。又自立爲代王。刊本代訛大。今改。又破豨將張春于聊城。案此聊城當是廝城。卽戰國策呂不韋所謂秦子異人質于趙處于廝城者。非魯連射書燕將之聊城也。舊本俱誤。

卷九十四

田儋列傳。相橫走博陽。案漢書作走博。蘇林曰。泰山博縣也。疑此陽字衍。又入海居島中。正義。案海州東海縣有島山。刊本東海訛東北。據唐書地理志改。

卷九十五

樊鄴滕灌列傳。舞陽侯樊噲者。沛人也。正義。沛徐州縣。刊本縣訛也。今改。又與司馬巨戰碭東。刊本巨訛尼。據高祖本紀。索隱及曹相國世家。正義改。又從攻長社。轅轅。正義。轅轅關在緱氏縣。刊本關訛門。今改。又別擊西丞白水。北集解。白水今廣平魏縣也。刊本脫平字。據漢書注增。又雍輕車騎于

雍南破之索隱。雍即扶風雍縣。刊本縣上衍昌字。今刪。又至雲中正義。今朔州善陽縣北三百八十里。定襄故城是也。刊本今訛皆據王鑿本改。又將軍太僕解福。刊本軍字下衍太卜二字。蓋沿王鑿本之誤。據明監本毛本刪。又破雍將軍焉氏。刊本焉訛烏。據索隱改。又攻其前拒。索隱小顏以爲攻其壁壘之前垣也。刊本脫前字。據漢書注增。又徐行面雍樹乃馳。集解南陽人謂抱小兒爲雍樹。案漢書注陽作方。與此異。又留公旋高密。刊本旋訛于。據索隱改。

卷九十六

索隱述贊。滕灌更王。案滕公夏侯嬰及灌嬰俱未封王。此更王二字疑誤。

張丞相列傳。臣不能言。然心知其不可。正義昌以口吃。刊本昌訛期。今改。又任敖者。故沛獄吏。集解曾孫越人。刊本曾訛魯。今改。又太上皇廟壝垣。集解宮外垣也。刊本宮訛官。今改。又子侯去病代。集解一本無侯去病。刊本侯訛此。今改。又桃侯劉舍爲丞相。刊本舍訛舍。據功臣侯表。衛綰傳及漢書改。

卷九十七

酈生陸賈列傳。布不聽而聽梁父侯。遂反。索隱布用梁父侯計。遂反耳。刊本用上衍不字。據漢書臣瓚注改。又乃奉百金往稅。案稅漢書作稅。顏師古注曰。其字從衣。又說文云。贈終者衣被曰稅。似其字當作稅。但考詩衛風說於農郊。說本或作稅。鄭康成亦以衣服曰襁。解之知說稅二字古與襁稅通。不必

作衣旁始爲襜也。今仍之。又沛公邊雪足杖茅。刊本邊訛據王鏊本改。索隱述贊始冠側注。刊本冠訛官據本傳改。

卷九十八

傳靳蒯成列傳。子頃侯精立。刊本頃訛須。考諡法無須字。據表改。又蒯成侯縹者。索隱漢書作鄴。刊本鄴訛據下文改。又縹子居代侯。索隱沛郡有鄆縣。刊本鄆訛多。據漢書地理志改。又表云子應不同也。刊本也訛者。據毛本改。

卷九十九

劉敬叔孫通列傳。婁敬脫輓輅。索隱輓者牽也。刊本輓訛晚。今改。又今陛下起豐沛。刊本豐下衍擊字。案高帝本紀無擊沛事。據漢書刪。又迺令羣臣習肄。刊本肄訛隸。注同。據毛本索隱改。又奈何令後世子孫乘宗廟道上行哉。集解其道值所作複道下。刊本脫下字。據漢書如淳注增。

卷一百

季布欒布列傳。置廣柳車中。索隱諸飾所聚。刊本飾訛色。據周禮縫人註改。又數招權。集解招求也。刊本求訛來。據漢書孟康注改。又徒以彭王居梁地。刊本徒訛徙。今改。又吳軍反時。以軍功封俞侯。案漢書吳軍作吳楚。疑此軍字誤。

太史公贊。身屢典軍。搃旗者數矣。案索隱作身覆軍。無典字。此典字疑衍。

卷一百一

袁盎鼂錯列傳。陛下竟爲以天下之大。刊本爲以二字互倒。據明監本王本改。又袁盎引却慎夫人坐。集解。豫設供帳待之。刊本脫帳字。據漢書如淳注增。又鼂錯謂丞史曰。集解。丞史丞及史也。刊本及訛相。據漢書改。

卷一百二

張釋之馮唐列傳。張廷尉釋之者。堵陽人也。正義應劭曰。哀帝改爲順陽。考地理志。此註在博山下。不釋堵陽。又哀帝作明帝。疑此誤。又西抑強秦。南友韓魏。案友。漢書作支。又其軍市租。索隱案。漢書市肆租稅之人。刊本脫書字。今增。又主中尉及郡國車士。集解。車戰之士。刊本戰訛軍。據漢書服虔注改。

卷一百三

萬石張叔列傳。爲便坐。索隱蓋謂爲之不處正室。別坐他處。刊本他訛之。今改。又孝文時以治刑名言。索隱。崇上抑下。合于六經也。刊本經訛家。據漢書注改。又刑名家卽太史公所說六家之二也。此說非。刊本脫此說非三字。據漢書注增。

卷一百五

扁鵲倉公列傳。視見垣一方人。索隱言能隔牆見彼邊之人。則眼通神也。刊本眼訛服。據毛本改。又盡

見五臟癥結正義六府謂大小腸胃膽膀胱三焦也刊本脫小字今改又鑿石播引案抗毒熨刊本抗訛杭毛本索隱訛杙考索隱此字音玩謂玩弄身體使調則作抗爲是今據改又因五藏之輸正義大腸之原出於合谷刊本合作全據難經改又聞病之陽論得其陰正義幕在陰俞在陽刊本幕訛募又腹爲陰五藏幕皆在腹刊本腹訛腸據下文背爲陽五藏俞皆在背句知此當是腹字今並改又忽忽承腴索隱音接刊本接訛挾據毛本及王本改又代則絡脈有過正義遂上魚爲溢爲外關內格案魚下脫際字又經主病和者正義其自高骨從寸至尺名曰尺澤刊本自高骨訛作高自骨今改又脈法曰脈來數疾刊本疾訛病據宋本改又病得之流汗出滫刊本滫訛滫據毛本改又言蹶陰之絡結小腹也案素問靈樞難經脈蹶俱作厥此誤

太史公贊下正義小腸謂受穀而傳入於大腸也刊本受訛之今改又溫五藏主藏意刊本意訛榮據王祐注素問改又兩足各有三陰刊本脫三字據上足三陰之脈句增

卷一百六

吳王濞列傳卒踐更輒與平賈集解爲卒者雇其庸刊本者雇二字互倒據漢書注改又正義古者正卒無常人皆當迭爲之刊本迭爲二字訛作迭字據漢書昭帝紀如淳注改又又行者出錢三百入官云云案漢書注作又行者當自戍三日不可往便還因便住一歲一更諸不行者出錢三百入官以給戍者此又行者下直接出錢云云當有脫又西走蜀漢中正義走音奏刊本奏訛後據蒙恬傳

注改。又如得列將人戶三千。刊本戶訛邑。據王鑿本改。又初吳楚反書聞。兵未發。刊本脫初字。據漢書增。又楚兵輕正義。輕遣正反。刊本脫遣字。據左傳隱公九年釋文增。又比至城陽正義。地理志云。城陽國故齊。刊本云下衍城陽志云四字。據漢書地理志刪。又且以誅錯。刊本誅訛銖。今改。

卷一百七

魏其武安侯列傳。輒令財取爲用。集解。令自裁度取爲用也。刊本令自二字互倒。據漢書注改。又魏其者。沾沾自喜耳。集解。沾一作怙。刊本怙訛恬。今改。又或曰。沾音瞻。刊本瞻訛愴。據張晏注漢書改。又學槃孟諸書集解。應劭曰。黃帝史孔甲所銘也。凡二十九篇。刊本史訛使。九訛六。檢漢書注。應劭說作二十九篇。與孟康說異。今據改。又堂前羅鐘鼓。立曲旃。集解。禮大夫建旃。曲旃。柄上曲也。刊本建旃訛作立。曲旃。脫下旃字。據漢書注改增。又索隱說文。曲旃。所以招士也。考說文作旃。旗曲柄也。所以旃表士衆。與此異。又引繩批根。集解。批根。賓客棄之者。不與交通也。刊本也字訛在賓客二字下。又根根格。刊本格訛括。並據毛本索隱及漢書注改。又辟倪兩宮間。索隱。辟。普係反。刊本辟訛碎。今改。又局趣效轅下駒。正義。應劭曰。駒馬。駕著轅下。刊本駕訛加。脫下字。據漢書注改增。又且帝寧能爲石人耶。正義。言徒有其形耳。刊本脫形字。據漢書注增。又武安侯坐衣襜褕。正義。衣蔽前謂之襜。刊本衣訛今。據爾雅改。

卷一百八

韓長孺列傳。韓安國者。梁城安人也。正義地理志云。成安屬潁川郡。刊本地理志訛作括地志。據漢書改。又見大長公主正義。如淳曰。景帝妹也。案毛本漢書如淳注妹作姊。又悅一邪臣浮說。索隱悅漢書作誦。說文。誦。誘也。刊本誦訛忱。據漢書及說文改。

卷一百九

李將軍列傳。不擊刁斗以自衛。索隱。銷。卽鈴也。刊本銷訛鏹。案此解蘇林形如銷句。今據毛本改。又然亦遠斥候。索隱。許慎註淮南云。刊本脫注字。據毛本增。又諸侯多中首虜。集解。本秦法。得首若干。封侯。刊本秦訛義。今改。

卷一百十

匈奴列傳。其奇畜則橐駝。索隱。背肉似橐。故云橐也。刊本橐訛駝。駝脫也字。又包愷音托。刊本托下衍他字。據毛本改。又馱駝。索隱。廣志音決蹄也。刊本音訛云。據毛本改。又毛本索隱。廣志作廣異志。與此異。又周西伯昌伐畎夷。氏。索隱。山海經云。黃帝生苗。至是爲犬戎一段。考山海經作黃帝生苗龍。苗龍生融吾。融吾生弄明。弄明生白犬。白犬有牝牡。是爲犬戎。與此注異。又武王伐紂而營雒邑。索隱。出上郡。雕陰。秦昌山。刊本雕訛彫。據漢書注改。又遂取周之焦穫。正義。在雍州涇陽縣城北。十數里。刊本城北二字互倒。今改。又齊釐公與戰于齊郊。索隱。釐音僖。名諸兒也。案春秋及世家。齊僖公名祿父。僖公子襄。公名諸兒。此索隱誤。又襄王奔于鄭之汜邑。索隱。汜音凡。刊本凡訛泛。據毛本改。

又或居于陸渾。索隱杜預以爲允姓之戎居陸渾。刊本允訛九脫渾字。據左傳注改增。又翟獯之戎。索隱天水有綿諸道獯道。案此正釋本文獯字。刊本獯訛狄。據漢書地理志改。又燕北有東胡山戎。索隱以父之名字爲姓。刊本訛作以之名烏號爲姓。據毛本改。又後有所愛闕氏。索隱今日始視紅藍。刊本視訛親。又後當爲足下致其種。刊本脫爲字下字。並據毛本改增。又至朝那膚施。正義膚施縣秦因不改。案此當作膚施秦縣。漢因不改。又後北服渾庾屈射丁零。刊本零訛靈。注同。今改。又故使郎中係雩淺奉書。索隱係胡計反。刊本訛作係音計。據毛本改。又駕二駟。正義二駟八匹馬也。刊本脫二字。據漢書注增。又攻祁連山。索隱南北百里。刊本脫南字。據毛本增。又令吾太子爲質無幾矣。正義幾音古紀反。言無所冀望也。刊本古紀訛紀言言訛古。據王鑿本改。又至廬胸。集解廬胸匈奴地名也。刊本脫胸字。據毛本增。又正義地理志云五原郡稠陽縣北出石門鄯得光祿城。又西北得支就城。又西北得頭曼城。又西北得庫河城。又西北得宿虜城。刊本地理志訛括地志。稠訛相支就城。訛支就縣。庫河城訛牢城。河宿訛宥。並據漢書改。又昔齊襄公復九世之讐。刊本九訛百。又集解九世猶可以復讐乎。曰雖百世可也。刊本脫曰字。可下衍知字。並據漢書及公羊傳改刪。

卷一百一十一

衛將軍驃騎列傳。今車騎將軍青度西河。正義今勝州東河也。刊本今訛云。今改。又長史安。正義律都軍官長史一人也。刊本脫長字。據漢書注增。又斬單于大父行籍若侯產。案此句當依漢書張晏及

顏師古注作單于祖父行籍若侯名產爲是。本注索隱謂籍若是匈奴祖之行第。產卽大父之名。竟爲斬單于祖矣。失其辭。又殺折蘭王正義。今鮮卑有是蘭姓者卽其種。刊本是訛。據漢書注改。又大當戶銅離索隱。徐註與表同。今案漢書本傳作調。雖功臣侯表作稠。雖與此徐廣說作稠離俱異。索隱云同誤也。又減隴西北地上郡戍卒之半。刊本地沿明監本誤作平。據王鑿本改。又將軍路博德平州人正義。案西河郡今汾州。刊本汾訛邠。據唐書地理志改。

卷一百十三

南越尉佗列傳。置桂林南海象郡。索隱略陸梁地以爲南海桂林象郡。刊本桂訛鬱。據秦本紀改。又用爲南海龍川令正義。有龍穿地而出卽穴流泉。刊本流下衍東字。據漢書注刪。又要之不可以悅好語入見。刊本悅訛說。據毛本索隱改。又卽藏其先武帝璽。索隱李奇云。刊本奇訛郤。據毛本及漢書南粵傳注改。又犁旦城中皆降伏波。索隱漢書亦作遲明。刊本漢書下衍史記二字。據毛本刪。又皆得爲侯。索隱封爲隨桃侯。刊本脫隨字。據毛本及漢書南粵傳增。索隱述贊。越權南裔。刊本權訛推。又卒從勦棄。刊本棄訛絕。並據索隱改。

卷一百十四

東越列傳。閩越王無諸。索隱故字從虫門聲。刊本門訛閩。據說文改。又以其地爲閩中郡。索隱小顏以爲卽今之泉州建安也。案此句索隱無。又都東甌。索隱永嘉記水出永寧山。刊本脫永字。據毛本增。

又令諸校屯豫章梅嶺待命。索隱在洪崖山。刊本崖訛崔。據毛本改。又入白沙武林。索隱名曰白沙坑。刊本坑訛沙。據毛本改。

卷一百十五

朝鮮列傳。自始全燕時嘗略屬真番。集解番普寒反。刊本寒訛蓋。今改。

卷一百十六

西南夷列傳。自同師以東。索隱漢書作桐師。刊本師訛鄉。據漢書改。又冉駝最大正義。其山有六夷七

羌九氏。刊本氏訛蠻。據後漢書改。

卷一百十七

司馬相如列傳。其山則盤紆第鬱。刊本沿明盤本誤第作第。據王鑿本及漢書文選改。又雌黃白埒。集解白埒白石英也。刊本埒訛符。據漢書注改。又案衍壇曼。索隱衍音弋戰反。刊本戰訛單。據毛本改。又其高燥則生箴蘄苞荔。索隱蘄漢書作析。刊本蘄字析字互訛。又孟康云。斯禾似燕麥。案漢書斯禾二字作析字。又皆如中國燕麥是也。刊本如中國訛作中國苗。據毛本改。又其埤溼。刊本埤訛卑。註同。據漢書及文選改。又則生藏菘兼葭。索隱似藎而細小。刊本藎訛藎。據漢書注及爾雅釋文引字林改。又江東人呼爲烏蘆。刊本蘆訛燕。據爾雅注改。又其中則有神龜蛟鼉。正義小頭細頸有白嬰。刊本訛作小細頭有白嬰。又鼉似蜥蜴而大。刊本蜥訛蜥。並據山海經注改。又木蘭正

義。葉冬夏常似春。刊本春訛冬。據廣雅改。又檣梨棹栗。刊本檣訛櫓。據明監本王本及漢書文選改。

又於是鄭女曼姬。正義。楚武王夫人鄧曼。刊本脫曼字。今增。又觀乎成山。索隱。郭璞言在山游觀。

刊本山訛小。今改。又出入涇渭。索隱。涇水出安定涇陽縣。刊頭山。刊本并訛筭。據漢書地理志改。

又酆鄙潦滂。索隱。滂湧出聲也。刊本湧訛通。據漢書注改。又禺禺鱸鮒。集解。鮒音納。刊本納上行音。

榻二字。今刪。又鷖鷓鴣鱸。集解。鷓鴣也。刊本鷓訛鷓。據漢書注改。又丘墟嶠嶽。正義。皆堆壠不

平貌。隱麟鬱嶽。正義。皆其形勢也。案漢書注引郭璞說。上句作皆其形勢也。下句作皆堆壠不平貌。與

此正義異。又窮奇象犀。索隱。一角在頭也。案小顏注漢書云。一角在鼻。一在額前。與此異。又沙棠

櫟。櫟。集解。櫟似杓。刊本杓作樵。案漢書注云。杓音零。今據改。又華汜壁櫪。索隱。葉圓而岐。刊本葉訛

素。據毛本改。又蜥胡毅蛭。索隱。案山海經云。刊本脫海字。據毛本改。又縉白虎。索隱。著白虎文。縉

也。刊本文訛之。據毛本及漢書注改。又格蝦蛤。刊本蝦訛瑕。據毛本索隱及漢書文選改。又掩細

柳。正義。在昆明池。南柳市。刊本脫池字。據文選注增。又淮南于遮。索隱。淮南鼓員四人。刊本脫鼓字。

據漢書樂志增。又洞出鬼谷之窟。壘。集解。鬼谷在北辰下。案漢書注作鬼谷。在崑崙山北。直北

辰下。又西望崑崙之輒。正義。出于崑崙西北隅。刊本訛作出書于西河北隅。據上下文義改。又黃

河出東北隅。刊本河訛海。今改。又文王改制。集解。孟子稱文王生于畢郢。案孟子文王生于岐。周卒

於畢郢。與此異。又招翠黃乘龍於沼。集解。訾黃其何不徠下。刊本訛作紫黃。湛河不下來。據漢書禮

樂志改。

卷一百十八

淮南衡山列傳。子賜爲陽周侯。刊本陽周二字互倒。案周陽乃淮南王舅趙兼所封。非此子賜封。今據惠景閒侯者年表及漢書表傳改。又男子之所死者一言耳。集解不成則死一計耳。刊本一訛二。據王鑿本改。

卷一百二十

汲鄭列傳。然至其輔少主。守城深堅。案城漢書作成。又賈人與市者。刊本賈訛買。據明監本改。又爲大農儼人。索隱儼音卽就反。刊本卽訛郎。今改。

卷一百二十一

儒林列傳。焚詩書坑術士。正義今新豐縣溫湯之處號愍儒鄉。溫湯西南三里有馬谷。谷之西岸有阮。古相傳以爲秦阮儒處也。刊本二湯字俱訛陽。又三里訛三百里。以字下脫爲字。並據漢書儒林傳注增刪改。又申公入見高祖於魯南宮。案正義引括地志及鄭康成泮宮說解之。則南宮當作泮宮。又逸書得十餘篇。索隱孔臧與安國書云。刊本脫書字。據毛本增。又何圖乃有百篇邪。刊本何訛河。今改。

卷一百二十二

酷吏列傳。吏苛察盜賊惡少年投鋸。刊本鋸訛鋸。據毛本索隱及漢書改。

卷一百二十三

大宛列傳。與堂邑氏故胡奴甘父。案集解不釋故字。索隱及漢書張騫傳俱無故字。此故字誤衍。又東流注鹽澤正義。鹽澤去玉門陽關三百餘里。刊本脫去字。陽字據漢書西域傳增。又安息正義。南乘海乃通大秦。刊本南訛自。據漢書西域傳改。又其西則條支正義。土多金銀奇寶。刊本多訛地。據後漢書西域傳改。又大秦在安息條支西。刊本脫息字。據下句增。又植之滋息無極。刊本植訛擲。今改。又安息長老傳聞正義。既是安息長安耆老傳聞。案史本文無安耆二字。此誤衍。又西有弱水流沙。刊本沙訛水。今改。又先儒多引大荒西經云云。檢大荒西經無此文。觀下云與大荒西經合。則此非大荒西經明矣。四字誤。又太子有子曰岑娶。案娶漢書西域傳作陲。太史公贊下索隱。其實出於冢嶺山。刊本冢訛葱。據毛本及尙書傳改。

卷一百二十四

游俠列傳。與季次原憲。刊本與訛予。又近世延陵集解。故有延陵之號。刊本故訛何。今並改。又乘不過鞦牛。索隱。大牛當軛。小爲鞦牛。刊本脫小爲鞦牛四字。據毛本增。又是時濟南睢氏。索隱。睢音間。刊本間訛閑。據毛本改。又至踐更時脫之。集解。貧者欲得顧更錢者。刊本錢訛踐。據漢書昭帝本紀注改。又東道趙他羽公子。索隱。舊解以趙他羽公子爲二人。刊本羽訛與。又脫二字。據毛本改增。

卷一百二十五

佞幸列傳。於是賜鄧通蜀嚴道銅山。正義案榮經卽嚴道。刊本案訛邑。今改。又吏輒隨沒入之。索隱別有物賜通。吏輒沒入。刊本脫賜通二字。據毛本增。

卷一百二十六

滑稽列傳。髡髮鞮鞢。集解。喪袂也。刊本袂訛衿。今改。又苦爲河伯娶婦。正義。河伯華陰潼鄉人。刊本陰訛陽。今改。又遂爲河伯娶婦也。案娶婦二字衍。又西門豹卽發民鑿十二渠。正義。令吾臣皆如西門豹之爲人臣也。刊本訛作今吾爲臣皆非西門豹之爲人臣也。據漢書溝洫志改。又遂引漳水溉鄴以富魏之河內。刊本富下衍漳字。內訛名。據漢書溝洫志刪改。又左思魏都賦云。刊本脫都字。今增。

卷一百二十八

龜策列傳。卽以篝燭此地。集解。陳涉世家曰。夜篝火也。刊本篝俱訛篝。據陳涉世家改。又因以醮酒佗髮。刊本醮訛譙。據王鑿本改。又謹以梁卯煇黃。索隱。煇灼龜木也。刊本脫灼字。據毛本增。又大論曰。索隱及命兆之辭。刊本兆訛召。今改。

卷一百二十九

貨殖列傳。夫山西饒材竹穀纆。索隱。穀音谷。又音雒。刊本訛作音谷。雒反。據毛本改。又龍門礪石。正義。

龍門山在徐州龍門縣。考唐地理志河中府龍門縣先爲秦州治。後隸絳州。後隸河中府。不言徐州。此徐字應誤。又筋角銅鐵正義山上有赭。其下有鐵。刊本脫上有字。據管子增。又設輕重九府正義。周有太府。玉府。內府。外府。泉府。天府。職內。職金。職幣。刊本脫泉府職幣四字。據漢書食貨志注增。又人民矜懽。攸集解。今北土名彊直爲懽中也。刊本北訛以今改。又跼屣集解。張晏曰。舞屣也。刊本舞訛。跼據下。潁川節注改。又陶睢陽正義。今宋州宋城也。刊本城訛地。據唐書地理志改。又陳在楚夏之交。正義。夏都陽城。刊本都下衍計字。今刪。又東海吳廣陵正義。東海郡今海州也。刊本州訛郡。據唐書地理志改。又江南正義。徙都宛陵。刊本陵訛城。據元和郡縣志宣州文改。又此言大江之南。豫章長沙二郡。乃是南楚之地耳。刊本脫乃是二字。複衍南楚二字。今增刪。又鄖關集解。案漢中亦作徇字。考地理志漢中旬陽有旬水。或作洵。不作徇。又果隋羸蛤。刊本隋省作隋。據毛本索隱改。又正義。修太史公書述地志。乃改云果蔗羸蛤。刊本志訛云。改訛故。據此所引地理志改。又濁氏連騎。索隱以末椒薑粉之訖。刊本粉訛坊。據毛本改。

卷一百三十

太史公自序。命南正重以司天。索隱。故命南正重司天。刊本南下衍方字。今刪。又程伯休甫其後也。索隱。然案班彪之序。刊本案班訛後。案據王鑿本改。又賜死杜郵。索隱。其地後改爲李里也。刊本李里二字互倒。據毛本改。又皆葬高門正義。夏陽縣故城東南有司馬遷冢。刊本脫城字。今增。又談爲

太史公索隱則令郡縣所上圖書刊本郡訛州圖訛國據毛本改
屋訛屈據漢書注改又食土簋集解一作瑠刊本瑠訛溜今改
二十二里刊本驛訛鄉北訛各據王鑿本改

又茅茨不翦正義屋蓋曰茨刊本
又鄉射鄒驛正義驛山在鄒縣北



四庫全書考證卷二十五

史部


史記索隱

前漢書

班馬異同

三國史辨誤

晉書



史記索隱 唐司馬貞撰

卷十二

晉世家長女妻重耳。注左傳刊本左訛氏今改。

卷二十五

東越列傳閩中郡。注今建安侯官是。刊本今訛本據史記注改。

前漢書 漢班固撰

目錄

古今人表刊本人下衍物字據本書表刪。

卷一上

高帝紀沛公欲王關中令子嬰相珍寶盡有之。刊本盡訛書據史記通鑑及監本毛本改。

卷一下

殷畔楚以舒屠六。注師古曰六者縣名後屬廬江郡。刊本郡訛都據本書地理志改。

卷二

惠帝紀及宦皇帝而知名者注如淳曰知名謂宦人教帝書學有可表異者也刊本有訛亦據監本毛本改

卷三

高后紀逐產殺之郎中府吏舍廁中注如淳曰百官表郎中令掌宮殿門戶故其府在宮中刊本其訛某據監本毛本改

卷四

文帝紀母曰薄姬注臣瓚曰漢祿秩令及茂陵書姬並內官也刊本祿秩二字互倒今改
夏四月除盜鑄錢令注應邵曰聽民放鑄也刊本民放二字互倒據監本毛本改
十一月淮南王長謀反廢遷蜀嚴道死雍刊本脫雍字據本注及諸侯王表增
民得買爵刊本買訛賣據監本毛本改

卷五

景帝紀膠西王卬刊本卬訛印據本傳改

卷六

武帝紀丞相綰奏所舉賢良或治申商韓非蘇秦張儀之言注衛公孫鞅封於商號商君刊本商君訛秦君今改

六年冬初算商車。刊本算訛等。據本注及毛本改。

元狩元年冬十月。行幸雍祠五時。獲白麟。注麟麋身牛尾。刊本麋訛麋。據爾雅改。

元鼎四年冬詔曰。祭地冀州。注汾陰本冀州地也。周時乃分爲并州。刊本并訛荆。據監本毛本改。

元封五年。初置刺史部十三州。注常以秋分行部。刊本常訛治。據監本毛本改。

卷七

昭帝紀。元鳳元年。武都氏人反。遣金吾馬適建龍額侯韓增等擊之。注弓高侯韓隤當子。饒封龍額侯。刊本隤訛頹。據功臣侯表改。

卷八

宣帝紀。地節四年詔曰。迺者東織室令史張赦。注令史其主者吏。刊本吏訛史。據監本毛本改。

卷九

元帝紀。初元元年詔曰。惟德淺薄。不足以充舊貫之居。刊本脫舊貫二字。據毛本增。

卷十

成帝紀。三年春。虜上小女陳持刀闖入尙方掖門。注無符籍妄入宮曰闖。刊本宮訛官。據別本改。

卷十三

異姓諸侯王表。高后二年。長沙共王若嗣。案若吳芮傳作右。

卷十四

諸侯王表。中山靖王六世懷王修嗣。案修中山靖王傳作循。

卷十六

高惠高后文功臣表第三格。始封。刊本始訛姓。據監本改。

陽陵景侯傅寬第四格。師古曰。漢列侯位次簿有謚號姓名。與史所記不同者。刊本列侯訛列侯。據監本改。

鄧文終侯蕭何六世。釐侯喜。以何玄孫之子南繼長紹封。刊本繼訛繼。據蕭何傳及地理志改。

開封愍侯陶舍第二格。以中尉擊燕代侯。刊本中訛十。據監本改。

高陵圉侯王虞人第二格。從起廢丘。刊本丘訛兵。據地理志改。

卷十七

景武昭宣元成功臣表。建陵哀侯衛綰第三格。二十一年薨。刊本訛一十二年。據監本改。

邳離侯路博德第二格。從驃騎將軍擊左王。刊本王訛右。據監本改。

梁期侯任破胡第四格。太始四年。刊本始訛史。據監本改。

荻苴侯韓陶。案荻。史記朝鮮傳作萩。本書朝鮮傳作秋。此訛萩爲荻。而師古音荻爲狄。非是。

南菴龍頰宜春陰安發干五人隨父。刊本干訛千。據本書地理志改。

卷十八

外戚恩澤侯表。鄔侯駟鈞。師古曰。鄔一戶反。刊本脫一字。據監本增。

冠軍景桓侯霍去病。刊本桓訛栢。據霍去病傳改。

宜鄉侯馮參。刊本宜訛宜。據功臣表改。

卷十九上

百官公卿表。衛尉秦官。注。衛士于周垣下爲區廬。區廬者若今之仗宿屋矣。刊本下訛不仗訛伏。據監本毛本改。

太僕條。龍馬閑駒。橐泉駒駮。承華五監長丞。刊本承訛丞。據毛本及下卷注改。

諸侯王金璽。鑿綬。注。黃金璽。橐駝鈕。刊本駝訛佗。據監本毛本改。

卷十九下

高帝五年第十三格。軍正陽成。延爲少府。刊本成訛咸。據玉海官制類改。

孝文十六年第四格。淮陽守申屠嘉爲御史大夫。二年遷。刊本訛在上。太尉格內。據毛本移正。

元鼎二年第六格。廣安侯任越人爲太常。刊本安訛陵。據下注改。

元鼎三年第六格。鄆侯周仲居爲太常。師古曰。鄆音多。案鄆音多。寒反。有漢書周緹傳可據。而史記緹傳

及侯表注。漢書侯表。及地志注。水經注。並脫寒反二字。

建昭二年第十一格。左馮翊馮野王爲大鴻臚。刊本王訛正。據監本毛本改。

卷二十

古今人表中上格。伯嬰。刊本嬰訛。據經典釋文改。

中上格。華州。師古曰。卽華周。刊本周訛州。據監本毛本改。

卷二十二

禮樂志郊祀歌朱明章。登成甫田。百鬼迪嘗。注。言此粢盛皆因大田而登成。刊本粢訛迪。據監本毛本改。

卷二十三

刑法志民知有辟。則不忌於上。刊本知訛之。據左傳改。

卷二十四上

食貨志農民戶人已受田。其家衆男爲餘夫。案周禮載師注引此作一人已受田。刊本似脫一字。今仍其舊。

卷二十四下

令飢民得流就食江淮間。欲留留處。注。有欲住者留而處之。刊本住訛往。據監本毛本改。

然兵所過縣。縣以爲訾。給毋乏而已。不敢言輕賦法矣。案輕史記作擅。徐廣注云。一作經。謂不顧經常法。

據此輕字疑經字之訛。今仍其舊。

卷二十六

天文志前列直斗口三星隨比。崑銳若見若不見曰陰德。刊本比訛北。據毛本改。

卷二十七上

五行志陳夏徵舒殺君。注靈公飲酒于夏氏。徵舒射而殺之。刊本射訛討。據左傳改。

卷二十七中之上

能者養以之福。不能者敗以取禍。刊本以之二字互倒。據本注及後考證改。

帝微行出遊。過河陽主作樂。案河陽外戚傳作陽阿。此誤。

卷二十七下之上

楚僭稱王。後鄭拒王師。射桓王。刊本拒訛拒。據後考證改。

卷二十八上

地理志上黨郡沾縣。注大叟谷清漳水所出。刊本叟訛叟。據說文改。

蜀郡青衣縣。注大渡水東南至南安入澨。師古曰澨音哉。案說文繫傳引此作泝水。師古不辨泝字之訛。

而作音哉。非是。

隄爲郡郤鄆。刊本郤訛郁。據集韻改。

卷三十

藝文志揚雄所序三十八篇注太玄十九刊本太玄訛太廟據各本改

卷三十三

田儻傳大破齊楚軍案孫鑛曰史記作破齊魏軍此楚字似誤

卷四十一

樊噲傳從擊秦車騎壞東案何焯曰此秦字當爲雍史駁文

卷四十四

淮南厲王傳大王欲屬國爲布衣守冢真定案何焯曰屬國當爲傳國于子

卷四十六

萬石君傳慶方爲丞相時諸子孫爲小吏至二千石者十三人案何焯曰至上史記有更字若一時有十
三人爲二千石慶安得全

卷四十八

賈誼傳惠王親兄子也今之王者兄子之子也案何焯曰惠王當作哀王文帝元年齊哀王薨子文王則
嗣故曰今之王者兄子之子

卷四十九

爰盎傳郎署長布席盎引卻慎夫人坐案何焯曰郎署長亦從幸上林職司布席耳未必天子幸署也如

涓注恐非

卷五十一

鄒陽傳。然則軻湛七族。要離燔妻子。豈足爲大王道哉。案何焯曰。監本亦無荆字。以注尋之是也。不必以史記添補。

卷五十二

灌夫傳。廼劾嬰矯先帝詔害罪。當棄市。案何焯曰。史記無害字。此衍文。鄭注迂鑿。

卷五十四

李廣傳。因問廣食其失道狀。曰。青欲上書報天子失軍曲折。案何焯曰。度失道非喪師也。軍曲折上衍失字。史記無。

卷五十五

霍去病傳。與主合葬。起家象廬山云。案何焯曰。廬山當作廬山。匈奴傳揚雄上書曰。運府庫之材填廬山之壑而不悔。注廬山。匈奴中山也。以上文象祁連山例之。自明。又趙食其殺禰人。刊本禰訛。據地理志改。

卷五十七上

司馬相如傳。乃令文君當壚。案何焯曰。當字作對字釋之爲長。顏說非是。又浮勃澗游孟諸。案何焯曰。

縱言之耳。非必屬齊也。文注誤。又菼薑藎荷。注藎荷。蓴苴也。刊本苴訛蔓。據王逸楚辭注改。又尙摅乎襄陽。降集乎北紘。刊本摅訛擔。今改。

卷六十

杜周傳。逐捕桑弘羊。衛皇后昆弟子刻深。案何焯曰。桑弘羊謀反。在昭帝元鳳元年。此云逐捕桑弘羊。疑有誤。史漢並同。注家亦無及之者。恐因延年首發上官桀父子大姦。并誤以周爲逐捕弘羊也。

卷六十一

李廣利傳。桀令四騎士縛守詣大將軍。案何焯曰。將字衍文。如注強爲之說耳。下同。

卷六十二

司馬遷傳。於是論次其文。十年而遭李陵之禍。案何焯曰。十年。史記作七年。徐廣注曰。天漢三年作七。爲是。

卷六十三

廣陵厲王傳。使所幸八子郭昭君家人子趙左君等。鼓瑟歌舞。案何焯曰。太子止有妃良娣孺子三等。皇孫止有家人子。今藩國乃有八子之號。未詳。

卷六十四上

嚴助傳。臣聞越甲卒不下數千萬。刊本千訛十。據監本及陳本葛本改。

卷六十四下

王褒傳。故虎嘯而冽風。龍興而致雨。刊本冽風二字互倒。據監本及陳本葛本改。

卷六十五

東方朔傳。諷誦詩書百家之言。不可勝數。著於竹帛。案何焯曰。著讀陟略反。昌黎詩吾老著讀本此。

卷六十六

楊敞傳。真人所謂鼠不容穴。銜窠數者也。案何焯曰。真人猶云。誠若人言也。李奇注非。陳萬年傳。調發屬縣所出食物。以自奉養。注。調。徒釣反。刊本釣訛鉤。據監本及陳本改。

卷六十八

霍光傳。今陛下好與諸儒生語。人人自使書封事。案何焯曰。封。對之誤也。後因尙書屏不奏。乃上封事耳。又見其竈直突。傍有積薪。案何焯曰。突當爲窰。式林反。與突字窰字異。玉篇所分甚明。

卷七十

陳湯傳。縣旌萬里之外。揚威昆山之西。案何焯曰。昆山當指崑崙而言。

卷七十一

雋不疑傳。字曼倩。注。雋音徂。衰反。刊本徂訛字。據陳本改。又衣黃襜褕。著黃冒。注。冒所以冒覆其首者。即今之下裙冒也。刊本裙訛裾。據監本陳本改。

薛廣德傳。縣其安車傳子孫。案何焯曰。公羊家說縣與此異義。見仍叔之子來聘疏中。

卷七十二

王吉傳。吉兼通五經。能爲騶氏春秋。案何焯曰。騶氏春秋至班史時已成絕學。有錄無書。故特著之。兩龔傳。漢兄子曼容亦養志自修。爲官不肯過六百石。案何焯曰。曼容名丹。見儒林傳。

卷七十三

韋玄成傳。羣公百僚。我嘉我慶。刊本嘉訛加。據監本改。又其與將軍列侯中二千石二千石諸大夫博士議郎議。刊本脫二千石三字。據各本增。又祭不欲數。數則瀆。瀆則不敬。注。此禮記祭法之言。案祭不欲數三句。見祭義篇。此作祭法。似誤。

卷七十四

魏相傳。今光死。子復爲大將軍。案霍光傳。大將軍當作右將軍。又冠蓋交道。刊本道訛通。據各本改。又孝文皇帝時。以二月施恩惠於天下。賜孝弟力田及罷軍卒祠死事者。注。罷軍卒。新從軍而休罷者也。案新監本及陳本作所。

卷七十五

翼奉傳。觀情以律。注。情。謂六情。刊本脫六情二字。據監本毛本增。

卷七十六

尹翁歸傳。後去吏居家。刊本脫吏字。據各本增。又有論罪輸掌畜官。案監本及毛本陳本有字上並有豪彊二字。

王尊傳。更數二千石。二十年莫能禽討。刊本二十年訛二年。據各本增。

卷七十七

劉輔傳。河間宗室也。刊本室下衍人字。據監本及毛本陳本刪。

卷七十八

蕭望之傳。願竭區區底厲鋒鏑。注。鋒。刃端也。案韻會砥下引此注。此上有底柔石厲卓石六字。

卷七十九

馮奉世傳。永光二年秋。隴西羌三姐旁種反。案玉海一百五十七卷。引此作隴西羌三姐旁五種反。又

二千石病賜告得歸。有故事得去郡。刊本得去上衍不字。據各本刪。

卷八十

宣元六王傳。臯至不赦。刊本臯訛辜。據毛本改。

卷八十一

匡衡傳。衡射策甲科。注。丙科補文學掌故。刊本丙沿唐諱作景。今改。又卑不險尊。親不先故。案親。監本

毛本作新。

孔光傳。匡衡舉光方正爲諫大夫。刊本諫下衍議字。據各本及百官表刪。

卷八十二

史丹傳。傳昭儀及定陶王常在左右。而皇太子希得進見。又是太子長舅陽平侯王鳳爲衛侍尉中。與皇太子皆憂。不知所出。案皇太子監本陳本並作皇后太子。

卷八十三

薛宣朱博傳贊。馳騁進取。不師道德。刊本師訛思。據各本改。

卷八十四

翟方進傳。常鄉侯王惲爲車騎將軍。案惲監本陳本作輝。又親屬二十四人皆磔暴于長安都市。刊本磔訛礫。據各本改。

卷八十五

谷永傳。絕卻不享之義。慎節游田之虞。案何焯曰。義當作儀。

卷八十六

王嘉傳。先帝不獨蒙其譏。刊本譏訛議。據監本改。

卷八十七上

揚雄傳。履機槍以爲葦。注。機音初。咸反。刊本咸訛減。據毛本及韻書改。又雷鬱律而巖窈兮。刊本窈訛

突據李善文選注改。又徽車輕武鴻綱縛獵注。徽車有徽幟之車也。刊本有訛。又據監本改。

卷八十七下

蹂踐芻蕘。誇詡衆庶。刊本蹂訛蹂。又前番禹後淘塗注。駒駮馬出北海上。刊本駒駮二字互倒。並據各本改。又故有首衝錯測攤瑩數文。規圖告十一篇注。規音睨。刊本睨訛兒。據監本改。

卷八十八

儒林傳。於是詔太常使掌故鼂錯往受之。刊本鼂作朝。據監本及後考證改。又瑕丘江公受穀梁春秋及詩於魯申公。刊本受訛授。據各本改。

卷九十

酷吏傳。乃使光祿大夫范昆諸部都尉及故九卿張德等。案史記部作輔。又案百官表。有左右京輔尉屬中尉。當以史記爲是。

卷九十一

貨殖傳。人爭取賤賈。任氏獨取貴善。富者數世。案善字當從史記屬上句讀。司馬貞曰。謂買物必取貴而善者。不爭賤價也。正與師古上注意同。後說似非。

游俠傳。侯遵霑醉。突入見遵母。注。霑醉。言其大醉也。刊本醉訛溼。據本文改。

卷九十四上

匈奴傳。漢軍殺左大將。刊本脫左字。據各本增。又其冬單于自將萬騎擊烏孫。案監本及毛本萬騎上有數字。

卷九十四下

或因山巖石木柴僵落谿谷水門稍稍平之。注。僵落。謂山上樹木摧折。或立死枯僵墮落者。刊本上訛下。據各本改。又約令傳國與弟。刊本令訛立。據陳本及毛本改。

卷九十五

西南夷傳。南粵食蒙蜀枸醬。注。今宕渠有之。刊本宕訛石。據毛本改。

南粵王傳。求親昆弟請罷長沙兩將軍。注。佗之昆弟在故鄉者求訪之。刊本訪訛親。據監本及毛本改。

閩粵王傳。王閩中故地。都冶。案朱育傳。漢滅東越以爲冶。冶之爲縣在國滅之後。又其民盡徙。故領於會稽之東部都尉史。因後日之名書之耳。

朝鮮王傳。最以父死頗有功爲涅陽侯。刊本涅訛沮。據監本及功臣表改。

卷九十六上

西域傳。都護之起自吉置矣。案玉海起作置。置作始。與此異。

卷九十七上

外戚傳。何靈魂之紛紛兮。刊本魂訛魄。據監本及毛本改。又宣帝卽位。爲太皇太后。案劉敞曰。元帝尊

上官爲太皇太后宣字誤。又緩急相護，但恐少夫無意耳。刊本夫訛君，據陳本及毛本改。

卷九十七下

太后自養視數禱祠解。案何焯讀書記云：解禳而解之也。師古音懈，非。

卷九十八

元后傳：平阿侯譚位特進，領城門兵。刊本兵訛外。又太后旁弄兒病在外舍。注：官婢侍史生兒，取以作弄兒也。刊本官訛言，並據監本及毛本改。

卷九十九上

王莽傳：莽陰求其罪過，因大司馬曲陽侯根白之。刊本陰訛因，據陳本毛本改。又僮奴衣布，馬不秣穀。刊本衣布二字互倒，據監本及毛本改。又詩之靈臺書之作雒，注：庶民攻之。刊本民沿唐諱作人，今改。又漢家地廣二帝三王，凡十三州，州名及界多不應經。刊本十三州訛十二州，據毛本及地理志改。

卷九十九中

置六郊州長各一人，人主五縣。案何焯讀書記云：州長準周官，與前州牧準虞書者不同。劉奉世以爲衍州字者，誤也。下文亦稱六州。又乃遣并州牧朱弘游擊都尉任明等將兵擊匈奴。案明、陳本毛本俱作萌。

卷九十九下

莽憂懣不能食。饋飲酒。啗鮓魚。注。鮓音雹。刊本雹訛電。據廣韻及韻會改。

卷一百上

叙傳。東弘虐而殲仁兮。王合位虐三五。注。欲合五位三所。卽國語歲月日星辰之所在也。刊本合訛從。據監本改。又素文信而底麟兮。漢賓祚於異代。注。係殷後爲二代之客。刊本係訛孫。據監本改。

班馬異同 宋倪思編

卷二

高祖本紀。漢元年。留蕭何收巴蜀租。給軍食。刊本軍下衍糧字。據漢書刪。

卷三

蕭相國世家。乃下相國何廷尉。械繫之數日。刊本繫訛擊。據史記改。

卷六

陳丞相世家。彼項王骨鯁之臣。亞父。鍾離昧。龍且。周殷之屬。不過數人耳。刊本骨訛鞭。據漢書改。

卷十六

季布樂布列傳。季將軍不說足下。刊本軍訛君。據史記改。

卷三十三

貨殖列傳。稽足功用如此之備也。刊本此訛非。據漢書改。

二 國史辨誤 不著撰人名氏

魏武紀。其子邈。穆之字亦俱載焉。原本穆訛慎。據魏志注改。
張旣傳。儒坐救遲。召還。原本還訛遠。據魏注改。
牽招傳。原本招訛胎。據魏志改。

晉書 唐太宗御撰

卷一

宣帝紀。太和元年。達與魏興太守仲儀有隙。刊本沿明監本誤脫魏興二字。據毛本及三國魏明帝紀注所引魏略增。

景初二年。帝固讓子弟官不受。刊本脫帝字。據明監本毛本增。

卷二

文帝紀。增邑三百戶。案通志邑上有食字。此及明監本毛本脫。

景元四年。金城太守楊欣趨甘松。刊本欣訛順。據明監本毛本改。又仍斷大政。刊本仍作乃。據毛本改。

卷三

武帝紀。太康元年。克州四。刊本克訛得。據明監本鍾本毛本及通鑑通志改。
六年十二月庚子。刊本子訛寅。據明監本毛本及通鑑改。

卷四

惠帝紀。又詔子弟及羣官。刊本沿明監本誤作郡。據毛本改。又中書令蔣俊。刊本蔣訛符。據毛本及通鑑通志改。

永康元年。改封吳王晏爲賓徒縣王。刊本脫縣字。據明監本及毛本通志增。

永寧元年。問將何勗等。案毛鍾本何勗等作何勗盧播。

二年。平南將軍羊伊。刊本沿明監本誤伊作尹。據毛本及通鑑通志改。又帝旋軍於宣城場。刊本沿明監本誤脫場字。考水經注。洛陽北宣城觀北。矚宣城場。本書王戒傳。亦有于宣武場觀戲之文。今據毛

本增。

永興元年。以河間王顓都督中外諸軍事。刊本沿明監本誤脫顓字。據毛本及通志改。

卷五

史臣論。爾乃取鄧艾於農瑣。刊本瑣訛隙。據毛本陳明卿本改。

卷六

元帝紀太興元年詔昊天不融案詩小雅融作傭此蓋別有據本

永昌元年郗鑑爲安北將軍刊本郗訛郗據郗鑒傳改

明帝紀太明元年以軍國饑乏刊本國訛事據明監本改

卷七

康帝紀建元元年以輔國將軍瑯琊內史桓溫爲前鋒小督案鍾惺本小督作都督此仍明監本毛本之舊

卷八

穆帝紀永和五年征西大將軍桓溫遣督護滕駿討范文刊本沿明監本誤護作軍據毛本及通鑑通志改

簡文帝紀咸文二年故當無復近日事耶案毛本近作前此從明監本

卷十

安帝紀隆安五年秋七月段璣殺慕容盛案明監本毛本及通志璣俱作興此從本書載記及通鑑
義熙六年乃入衛京師案通志仍作並此仍明監本毛本之舊

卷十一

天文志序。夫皆掌著天文。刊本文訛人。據明監本毛本改。

用勾股重差推晷影極游。以爲遠近之數。案毛本注云重一作里。

州郡躔次濟陰入氏一度。案鍾本毛本一作二。此從明監本及文獻通考。又桂陽入軫六度。刊本六訛。十。據明監本毛本及文獻通考改。

卷十二

七曜熒惑芒大則人衆怒。案通考此句下有君子皇皇小人浪浪不有亂臣則有大喪人欺吏吏欺王二。十二字。此及明監本毛本俱無。疑傳寫脫。

填星不乃大水。刊本沿誤大訛火。據文獻通考改。

五星總論。七星爲員宮。刊本宮訛官。據明監本毛本改。

十輝赤氣爲人獸之形。刊本獸訛狩。監本毛本同。今據隋志改。

卷十三

月五星犯列舍。太元十二年六月癸卯。刊本卯訛酉。案癸卯距癸酉前後俱三十一日。考武紀是年六月有癸卯。則無癸酉甚明。今據明監本毛本改。

二十一年。又連歲水旱。刊本沿明監本誤。又作及。據毛本改。

安帝隆安五年。進軍蒲洲。刊本洲訛州。據明監本毛本改。

妖星客星咸寧二年六月甲戌星孛于氏刊本寧訛熙案晉武改元者四秦始咸寧太康太熙無咸熙據本紀改。

卷十四

地理志總序成湯敗桀于焦案尙書序及伊訓稱湯與桀戰于鳴條史記稱桀敗于有城之虛無有言焦者惟淮南子云革車三百乘困之鳴條禽之焦門帝王世紀云禽之焦門放之歷山疑此用焦門而誤脫門字。

市有候候有館館有積案周禮作市有候館候館有積鄭注云候館樓可以觀望者也此又誤又三十

一國盡亡其處注窮桑刊本桑下衍鞏字據明監本毛本刪。

穀酒以往奄有龜蒙刊本往訛注據漢書諸侯王表改。

東海王疆刊本疆訛疆據後漢書改。

司州河東郡垣刊本垣訛桓據前後漢志及元和郡縣志改。

雍州京兆郡霸城刊本城訛成據明監本及毛本改。

涼州武威郡摺次刊本摺訛揖又蒼松刊本蒼訛昌並據前後漢志改。

西郡蘭池注一云蘭絕池刊本池訛也據明監本及毛本改。

卷十五

荊州邵陵郡夫夷。刊本夫訛天。據前後漢志改。

揚州孫皓分會稽立東陽郡。刊本皓訛恪。據明監本鍾本毛本改。

卷十六

律麻志。午七百二十九分之五百一十三。刊本三訛二。據明監本及鍾本毛本改。又上下相生終於南事。刊本事訛呂。又能知命十二律不失一。刊本一下衍其中三字。又問準意。刊本意訛竟。並據續漢志刪改。

九月律長四寸六千五百六十一分寸。刊本上六字下衍分字。據文獻通考引此文刪。

總論夷則上生夾鐘。長七寸二千一百八十七分寸之千七十。刊本脫二字。據上文律中夾鍾節增。又

內庫外高。刊本庫字訛作房中二字。據續漢志改。又其餘與此尺同。刊本脫餘字。據文獻通考增。

又銘八十二字。案上銘止八十字。又通考作七曰建武錢八月建武銅尺。增多五字。又與古法七品之數不符。蓋此及通考俱有誤。

卷十七

推合朔度。大分二百二十五。刊本脫大字。據宋書志增。

月行三道術。十二日十二度十一分。案十二日與後十八日配均爲十一分。刊本十一兩字訛作七字。據

明監本鍾本及毛本改。

推五星合月數十三。刊本三訛。二據鍾本毛本及宋志改。五星歷步上。百九十萬五千八百六十四分半。而晨見東方。刊本萬上衍九字。據鍾本毛本刪。

卷十八

審農時而重人事。歷代然也。刊本然下衍之字。據宋書刪。

秋分。八月中。間限十五十一。案明監本毛本無一字。

金晨與日合。星五十二度十九萬四千九百九十分。考明監本毛本俱無九百兩字。此與宋志同。

卷十九

禮志總序。喪服本文省略。刊本服訛文。據毛本改。

魏明帝太和元年。江左以後。未遑修建。刊本後上衍議字。據明監本及鍾本毛本刪。

元帝太興元年。高子曰。靈星之尸。刊本尸訛戶。據詩小序改。

太康三年。風師。刊本師訛伯。又社稷五祀五嶽。刊本社訛土。又兆五帝。刊本脫五帝二字。並據周禮

改增。

魏元帝咸熙二年。七廟議。然臣愚謂廟室當以容主爲限。刊本容訛客。今改。

卷二十

咸寧十八年。車胤奏請爲告書如左班。刊本請訛謂。據明監本毛本改。

賀循答熊遠議。君子卿大夫之喪。刊本喪訛葬。據戴記改。
摯虞以爲古者諸侯君臨其國。刊本摯虞二字互倒。今改。

成帝時。中官亦年年拜陵。案鍾本毛本官作宮。注云一作官。

太康元年。王昌母喪儀。誠以人理應絕故也。刊本應訛廣。據諸本改。又而以常理處之也。刊本及南北
監本俱脫常字。據毛本增。又荀凱議曰。刊本凱訛頭。今改。

卷二十一

咸寧注上賀謁報。刊本賀下衍起字。據文獻通考刪。

衛瓘奏。今陛下勳高百王。德無與二。刊本百王二字作皇字。又脫與字。據毛本改增。又作者七十二君
矣。刊本二訛四。據管子及漢書司馬相如傳改。

漢儀立秋之日。牲以鹿麋。刊本訛作以爲薦麋。據後漢禮儀志改。

卷二十二

樂志。祠廟饗神歌。薦羞斯備。刊本薦斯二字互倒。據毛本改。

卷二十三

懷懷歌者。隆安初。俗間訛謠之曲。刊本脫初字。據明監本毛本增。

杯杓舞。金手以案杯杓。案宋書志。案作接。與此異。

舍利跳躍嗽水作霧翳日畢刊本霧訛露據明監本今鍾本毛本改。

卷二十四

職官志左右丞光武始減其二刊本二訛三據明監本毛本改。

卷二十五

輿服志序壇垂陰羽刊本羽訛雨據逸周書王會解改。

次大司農引從刊本脫司字又右少府引從刊本少下衍司字並據毛本增刪。

郡縣公侯黑緇皁繪蓋刊本緇訛細據明監本及鍾本毛本改。

長冠一名齊冠制如版刊本制訛問據後漢輿服志改。

巧士冠要後相通直豎刊本豎訛堅據後漢輿服志改。

皮弁以采玉珠爲璫刊本珠訛朱今改。

卷二十六

食貨志乃若一夫之士刊本土訛土又民之所求者學也刊本民訛明今並改。又金鏤傾宮案竹書

紀年云桀築傾宮此屬之殷紂誤。又王赧之季刊本之訛云今改。又史臣曰班固作食貨志刊本

食訛殖據漢書改。又於是衛覬議以爲鹽者國之大寶刊本脫以字今增。

卷二十七

五行志序。宣元之間。刊本元訛化。據漢書改。

木不曲直說。田狩有三驅之制。刊本脫田狩有三字。據漢書五行志增。

孫皓建衡二年三月大火。刊本二訛元。據三國志孫皓傳改。

太元十三年。螽斯則百堂災。乖螽斯則百之道。故災其殿焉。刊本乖訛乘。據明監本改。

傳曰。貌之不恭。時則有青眚青祥。刊本脫上青字。據漢書五行志增。

不爲威儀。貌氣毀。故有雞禍。刊本不上衍而字。威下脫儀字。又水歲雞多死。刊本雞多二字互倒。並據

漢書五行志增刪。

咸康元年。荊州長沙之攸醴陵。刊本長沙二字訛在之字下。據本書地理志改。

元康太安之間。江淮之域。有敗屨自聚於道。多者至四五十兩。刊本兩訛量。今改。又敗者疲弊之象。刊

本敗訛故。據毛本改。

卷二十八

時則毛蟲之孽。刊本時則二字互倒。據漢書五行志改。

魏人使其母手書呼雍。刊本魏訛蜀。據毛本改。

卽傾顛倒界之案。眞卽顛字。下顛字衍。

皆如童謠之言焉。刊本焉訛爲。據明監本及鍾本毛本改。

秀孝策。試乏四科之實。案明監本及鍾本俱無乏字。
視之不明傳。傷病民人。刊本民作疾。據漢書五行志改。

卷二十九

咸寧三年。馬隆又帥精勇討梁州。案明監本及鍾本梁俱作涼。

傳曰。思心之不容。據尙書洪範。思曰睿。伏氏五行傳。睿作容。班固漢書因之。此書蓋仍伏氏班氏之舊。

卷三十

刑法志。王肅疏。然衆庶不知。謂爲倉卒。刊本謂訛將。據三國志王肅傳改。

又刪定律令以爲漢儀。刊本儀訛議。又文集駁議三十篇。刊本駁議二字互倒。又博採古今瓌偉之

事。刊本事訛士。並據後漢書應邵傳改。又正篡囚棄市之罪。斷凶強無義之蹤也。刊本無訛爲。今改。

卷三十一

武元楊皇后傳。景命夙虧。刊本夙訛風。據明監本及毛本改。

卷三十三

王祥傳。有丹柰結實。案丹柰。世說作李。

王覽傳。門施五馬。案五毛本注云一作行。

何曾傳。曾見崇重如此。案曾通志作其。

石崇傳。頃之拜太僕。刊本脫之字。據毛本增。又士當身名俱泰。刊本身訛聲。據通志改。

卷三十四

羊祜傳。非所以隆先帝之勳。刊本非訛亦。今改。

卷三十五

裴頌傳。至王衍之徒。刊本徒訛從。據明監本改。

裴楷傳。傳緞汪翔靡所不見。案汪祥世說作江廡。

史臣論。楷則機神幼發。目以清通。刊本目訛自。據毛本改。

卷三十六

衛恆傳。轉注者以老壽考也。按此句無解。檢說文云。考。老也。老。考也。二字互訓。疑此壽字是訓字之訛。

又家殊國異。刊本國訛用。又杳杪邪趨。刊本杳訛杏。並據明監本及毛本改。

張華傳。統免冠謝曰。刊本冠訛官。今改。又有相者言吾年出六十。位登三事。刊本脫年字。據毛本改。

卷三十七

司馬休之傳。始知以譙王前事。良增嘆息。刊本知訛委。今改。

卷三十八

文六王傳。始去奢卽儉。刊本卽訛節。據通志改。又復蕤封。刊本脫封字。據毛本及通志增。

卷三十九

王沈傳。養于從叔司空昶。刊本司空訛司徒。據三國志王昶傳改。
荀勗傳。祖棐。案棐通志作蜚。

史臣論。過踰晉五。刊本五訛伍。據左傳外嬖梁五與東關嬖五文改。

卷四十

賈充傳。欲以充從孫散騎侍郎衆爲嗣。刊本從訛後。據明監本改。

卷四十一

魏舒傳。位儀同三司。刊本脫儀字。據通志增。又三公能辭榮善終者。刊本善訛錄字。據通志改。

劉實傳。各以讓賢舉能爲先務。則羣才蔚出。刊本蔚訛猥。據明監本及毛本改。

卷四十二

王濬傳。惟張華固勸。刊本勸訛勤。又披布丹心。輸寫肝膽。刊本膽訛腦。據通志改。又被壬戌詔書。案

壬戌通志作戊戌。又盜言孔甘。疑惑觀聽。刊本觀訛親。據明監本毛本及通志改。又每進見。陳其

攻伐之勞。刊本攻訛功。據毛本及通志改。

卷四十三

山濤傳。又以母老并贈藜杖一枚。刊本并訛拜。據明監本毛本及通志改。

王戎傳。三考黜陟幽明。刊本考訛載今改。又顧謂後車客曰。刊本謂訛爲。據通志改。
王澄傳。詔復澄本官。刊本本訛將。據通志改。

卷四十四

鄭默傳。不加聲色而猶有嫌怨。刊本脫有字。據毛本及通志增。
盧志傳。密謀遷都長安。刊本謀訛欲。據通志改。
華廙傳。廙固辭忤旨。刊本固訛因。據毛本改。

卷四十五

劉毅傳。漢城陽景王章之後。刊本城陽二字互倒。據明監本毛本及後考證改。又白者大晉之行。刊本
白訛意。據通志改。又猶愈侵枉之害。刊本侵訛清。據明監本改。
崔洪傳。叢生棘荆。來自博陵。刊本荆訛刺。據通志改。
郭奕傳。少還復往。案還。毛本及通志並作還。

卷四十六

劉頌傳。夫武王聖主也。成王賢嗣也。刊本嗣訛王。據毛本改。
李重傳。此三代所以直道而行也。刊本此訛在。據毛本及通志改。又非必曲尋事情而理無所遺也。刊
本遺訛道。據明監本改。又駁廷尉奏邯鄲辭等。刊本辭訛醉。據字書所引本書改。又又以博士徵

南安朱冲刊本南安二字互倒據本書朱冲傳及通志改。

卷四十七

傅咸傳令觸猛獸之鬚非欲爲惡必將以此見恕刊本恕訛怒據明監本改。又中郎李重李毅刊本毅訛義案李重傳云重與李毅同爲吏部郎今據改。又尙書在行馬之內而不得糾刊本得訛以據毛本改。

卷四十八

閻纘傳昔漢武旣信姦讒刊本姦訛好據毛本及通志改。又故曾子曰刊本曾訛孔今改。

卷四十九

嵇康傳故能越名教而任自然刊本而下衍自字據毛本及通志刪。又吾每讀尙子平臺孝威傳刊本威訛感據後漢書改。又恃愛肆姐刊本姐訛好據本書音義及文選改。又志在守樸刊本守訛宗據文選及通志改。

卷五十

庾敬傳兀與自然并體兮刊本兀訛元據明監本改。

庾莫傳不宜大啓土宇表建東海也刊本建訛見據毛本及通志改。又乃獨爲駁議刊本駁訛駿據明監本改。

秦秀傳不如太宰不得以爲比。刊本脫上不字。據本書賈充傳增。

卷五十一

摯虞傳。虞字中制。刊本治訛洽。據通志改。又天之所祐者順也。刊本順訛義。據周易及通志改。
王接傳。斯玉鉉之妙味。經世之徽猷也。刊本鉉訛鏡。據明監本改。

卷五十四

陸機傳。招覽遺老。刊本攪訛覽。又奇偉則虞翻陸績張溫張惇。刊本脫張溫二字。並據文選改增。又見百姓之謀已。則申宮警守。刊本警訛禦。據毛本及通志改。又鉦聲震于闔宇。刊本鉦訛征。據文選改。

卷五十四

夏侯湛傳。于何有寶咳喇之音。刊本咳訛叶。據明監本及毛本改。

潘岳傳。塵鷺連天。刊本鷺訛霧。案李善文選註云。鷺或爲霧者。非今據改。又坻場染履。刊本坻訛游。據方言及文選改。又雖吾顏之云厚。刊本吾訛無。據明監本及毛本改。又谿子巨黍異綮同機。刊本

機訛歸。據文選改。

潘尼傳。將歿。攜家屬東出成臯。刊本成訛城。據本書地理志改。

張載傳。勒銘山阿。敢告梁益。刊本阿訛河。據文選及通志改。

張協傳。百籟羣鳴。籠其山。刊本籠訛寵。又鑽屈穀之瓠。刊本穀訛穀。並據文選改。又遯惠風于蘅薄。刊本遯訛愬。據毛本及文選改。又債馮豕。刊本債訛攢。又虬踊螭騰。刊本踊訛踊。又時文載郁。刊本文訛人。並據文選改。

卷五十六

孫楚傳。簡習水戰。案本集此下有伐樹北山。則太行木盡。濬決河洛。則百川通流四句。又元康三年卒。刊本元訛太。案孫楚於惠帝時爲馮翊太守。不得卒于武帝太康年間。今據通志改。

卷五十七

張光傳。南平太守應詹。刊本平訛陽。據明監本及應詹傳改。

卷五十八

周玘傳。自號平西大將軍。刊本平西二字互倒。據明監本毛本及通志改。

周訪傳。陵江將軍黃峻等。刊本陵江二字互倒。據明監本毛本及通志改。又并獲第五猗。混胡摯瞻等。

刊本瞻訛曠。據毛本及前文改。又今骨肉尙欲相危。況他人乎。刊本危訛遠。據明監本毛本及通志改。

卷五十九

趙王倫傳。問出兵擊其別率孫髦。司馬譚孫輔皆破之。刊本髦訛靡。據明監本毛本通志及後文改。

齊王罔傳。暴罔尸于西明亭。刊本明作門。據毛本及通志改。

成都王穎傳。黃門郎程牧爲左司馬。刊本沿明監本誤牧作收。據毛本及通志改。

卷六十

張輔傳。班固序二百年事。乃八十萬言。刊本二訛三。據毛本改。

李含傳。隴西狄道人也。刊本狄訛逃。據本書地理志改。

卷六十一

苟晞傳。河內山陽人也。刊本內訛南。據明監本毛本及通志改。又從高密王泰。刊本從訛後。據通志改。

又天步艱險。刊本險訛難。案難字與下句複。據明監本毛本改。又憂歎累息。刊本歎訛思。據明監

本毛本改。

傳贊。威名克舉。刊本威訛成。今改。

卷六十二

劉琨傳。咸有敦詩說禮之德。刊本說訛閱。據左傳改。又幄中有懸壁。案文選幄作握。又邊萌頓仆。苟

懷宴安。刊本仆訛朴。據明監本改。

祖逖傳。屯于淮陰。起冶鑄兵器。刊本淮訛江。據通志改。

卷六十三

魏該傳。又與河南尹任愔相連結。刊本南訛北。據通志改。

卷六十五

王導傳。及帝登尊號。百官陪列。刊本官訛姓。據明監本及毛本改。又時帑藏空竭。庫中惟有練數千端。案毛本及通志。練俱作練。下倣此。

王洽傳。且欲時時相見。共講文章。刊本共訛其。據明監本及毛本改。

王珉傳。卽于別室與沙門法綱等數人自講。刊本沙訛法。據毛本及通志改。

卷六十六

陶侃傳。奈何與小人共載。刊本共訛其。今改。又都尉夏施盜官柳植之於己門。案施。毛本作拖。

陶瞻傳。悉取國中器仗財物。刊本仗訛使。據明監本毛本改。

卷六十七

溫嶠傳。時亮雖奔敗。嶠每推崇之。分兵給亮。刊本給訛結。據明監本改。又惟須仁公所統至。便齊進耳。

刊本便訛使。據毛本及通志改。

郗超傳。及超使見愔。慢怠屐而候之。刊本屐訛展。據通志改。又費百金而不吝。刊本吝訛足。據明監本

及毛本改。

郗恢傳。入漢川襲梁州。刊本川訛州。據明監本改。

史臣論言誓明于日月。刊本明訛盟。又皇輿旋軫。刊本旋訛從。並據明監本及毛本改。

卷六十八

紀瞻傳。其六則以明堂爲主。案明堂止青陽。明堂總章元堂太廟五名。故蔡邕月令論云。雖有五名而主以明堂也。此用邕說而訛五爲六。且有脫文。又除族誅之律。刊本族訛挾。據毛本改。又愚謂未當失兩儀之位。刊本位訛謂。據陳仁錫本改。

賀循傳。歷試二城。刊本城訛州。案上文云。賀循爲陽羨武康二縣令。不云爲州刺史。今據陳本毛本改。又慷慨發憤。志在節竭耳。刊本志訛忘。據毛本改。又此賢履信思順。苟以讓爲高者也。刊本苟訛非。據陳本毛本改。

卷六十九

劉隗傳。廬江太守梁龕。明日當除婦服。今日請客奏伎。刊本婦訛父。據通志及日知錄所引本書改。刁協傳。雖先有邪佞之罪。而臨難之日。黨于其君者。不絕之也。刊本佞訛侮。據毛本改。

卷七十

應詹傳。諸葛仁林。刊本仁訛成。據各本改。

卞敦傳。父俊清。真有檢識。刊本俊訛浚。據各本改。

劉超傳。凡陋小官。橫竊賞賜。刊本賜訛物。據毛本改。

鍾雅傳及峻逼遷車駕幸石頭雅超流涕步從刊本雅訛維據上文及毛本改。

卷七十二

郭璞傳焦先混沌而槁杭刊本先訛光各本俱同考焦先三國時人見魏志管寧傳注所引魏略今據改。
葛洪傳飾嫫母之駕陋求媒陽之美談案抱樸子序陽作媪此陽字誤。又不但大而笑之案抱樸子序無而字此衍。

卷七十三

庾亮傳因表爲中領軍刊本因訛困據毛本改。

庾翼傳故不令物情難之刊本沿監本誤不作小據毛本改。

卷七十四

桓膺傳永嘉太守略球等謀反刊本球訛驟據通志改。

桓謙傳與問謙刊本問訛請據監本毛本改。

卷七十五

王坦之傳恭順無爲則盛德日新刊本新訛親據毛本改。

荀崧傳初敦待崧甚厚刊本待訛侍據毛本改。

范甯傳子泰時爲天門太守刊本守訛宰據毛本改。

卷七十六

王允之傳。領司鹽都尉。刊本鹽訛監。據鍾本毛本及通志改。

王廙傳。痛謝鯤未絕於口。世將復至于此。刊本鯤訛現。據本書謝鯤傳改。又鯤遠有識致。刊本遠訛達。

據毛本及通志改。

王彪之傳。凡餘諸官無綜事實者。可令大官隨才位所帖而領之。刊本位訛住。據毛本改。

虞潭傳。王敦版潭爲湘東太守。刊本版訛叛。據通志改。又修滬瀆壘以防海沙。刊本沙訛抄。據毛本改。

卷七十七

蔡謨傳。方之于前。倍半之境也。刊本境訛絕。據通志改。又少子系有才學。案毛本此下有文義二字。

殷浩傳。于是與溫頗相疑貳。刊本于訛爲。據毛本改。又上追唐堯方命之刑。下鑒春秋無君之典。刊本

方訛仿。據尙書改。

卷八十

王羲之傳贊。鳳翥龍蟠。勢如斜而反正。案正別本作直。

卷八十一

王遜傳。遜未到州。遙舉董聯爲秀才。刊本到訛刺。據各本改。

劉楨傳。瑯琊王以聖德欽明。創基江左。刊本左訛右。據毛本及通志改。

朱侗傳。太守楊珉每請督將議巨賊之計。刊本之訛言。據各本改。
毛寶傳。乃設變力戰。悉獲其米。刊本米訛仁。據毛本及通志改。
毛瓌傳。瓌字叔連。案通志連作璉。

卷八十二

陳壽傳。益都耆舊傳十篇。案都通志作部。

王隱傳。君少長五都。宦遊四方。刊本五訛王。據毛本及祖納傳改。

孫盛傳。以家貧頗營資貨。部從事至郡察知之。服其高名而不劾之。刊本名訛明。據各本改。

習鑿齒傳。俛首重足。刊本首訛眉。據毛本改。

史臣論。令升安國有良史之才。而所著之書。惜非正典。刊本書訛事。據明監本及毛本改。

卷八十三

江道傳。山陵將用寶器。刊本陵訛林。據各本改。

車胤傳。今主上當陽升成王之地。案升毛本及通志作非。

卷八十四

劉牢之傳。成阻澗列陣。刊本成訛咸。又近日反司馬郎君。刊本脫反字。又而敬宣先還京口。拔其家。

刊本拔訛援。並據毛本及通志改。

卷八十五

劉毅傳。詔以毅爲都督豫州揚州之淮南歷陽廬江安豐堂邑五郡諸軍事。刊本脫堂邑二字。據本書地理志及通志改。

諸葛長民傳。琅琊陽都人也。刊本都訛郡。據本書地理志改。

檀憑之傳。可封曲阿縣公。刊本阿訛縣。據本書地理志及通志改。

卷八十六

張實傳。固辭驍騎將軍。請還涼州。刊本還訛遷。據通志及崔鴻十六國春秋改。又善惡專歸于上。雖賞

千金。終無言也。刊本善訛若。據毛本改。又沙等不之知。刊本之知二字互倒。據通志及毛本改。

張駿傳。右長司馬謨等。刊本謨訛模。據明監本毛本及通志十六國春秋改。又遠近嘉謨。號曰積賢君。

案十六國春秋作遠近嘉謨。多所延納。號稱賢君。又東界八郡置河州。刊本八訛六。案十六國春秋

云。分金城興晉武始南安永晉大夏武城漢中八郡爲河州。今據改。又東西遼曠。聲援不接。刊本接

訛捷。據明監本毛本及十六國春秋改。

張重華傳。秋遣晏以書誘宛戍都尉宋矩。刊本矩訛距。據本書宋矩傳及通志十六國春秋改。下同。又

進封福祿縣侯。刊本侯訛伯。案上文稱謝艾封福祿伯。此進封當爲侯。檢十六國春秋作侯。今據改。

又軍次神烏。刊本烏訛烏。又且吾又聞之。刊本且訛曰。並據十六國春秋改。

張天錫傳。肅景有勳。天錫深德之。賜姓張氏。又改其子以爲己子。刊本上子字訛作字。據毛本及十六國春秋改。又天錫諸子皆以大爲字。故景子曰大奕。肅子曰大成。刊本脫子字。據十六國春秋增。又此孫仲謀屈伸之略也。刊本伸訛身。據毛本及通志十六國春秋改。史臣論侯瑾。規泉知霸者之斯在。刊本知訛如。據毛本改。

卷八十七

涼武昭王傳。廣曾孫仲翔。後漢初爲將軍。刊本脫後字。孫訛祖。據十六國春秋增改。又移檄元盛使迎己。刊本脫檄字。據十六國春秋增。又業將且渠男成。又惡嗣。刊本脫成字。據通志及十六國春秋增。又宋繇張謖爲從事中郎。刊本謖訛稷。據明監本毛本及通志十六國春秋下並改。又志匡時難。克隆先勳。刊本克訛尅。今改。

涼後主傳。左將軍眺。刊本眺訛姚。據通志十六國春秋改。

卷八十八

李密傳。況臣孤苦。庭羸之極。案文選。庭羸之極。作尤爲特甚。庾袞傳。灑掃庭內。婦之道也。故賜汝以此。刊本脫以字。據通志增。劉殷傳。殷爲人之孫。而所思無獲。刊本脫孫字。據通志增。又良以色養。無主故耳。刊本無訛爲。據通志及毛本改。

傳贊。夙標至性。刊本夙訛風。據明監本毛本及通志改。

卷八十九

嵇紹傳。康誥有言。父子罪不相及。案康誥無此語。此係大禹謨。罰弗及嗣句。孔傳文。本書作康誥。誤。又

會帝還洛陽。刊本還訛遷。據毛本改。

劉敏元傳。同縣營。平年七十餘。案營毛本作管。

卷九十一

韋諛傳。深思聖王。苞桑之誠也。刊本誠訛誠。今改。

卷九十二

應貞傳。無義不經。無禮不踐。案文選作無理不經。無義不踐。又六府孔修。九有斯靖。刊本斯靖作來踐。與上無理不踐句韻複。據文選改。又弓矢斯御。刊本御作具。據文選改。

成公綏傳。咧繚眺而清昶。案文選作冽飄眇而清昶。又乃吟咏而發散。聲駱驛而響速。刊本散作嘆。駱驛作驛驛。據文選改。

左思傳。亦猶胡廣之于官箴。蔡邕之于典引也。刊本邕訛雍。今改。又並以經學洽博。刊本洽訛治。據毛本及通志改。

趙至傳。登高遠眺。則山川幽隔。刊本幽訛備。據文選改。又徙倚交錯。案徙倚。文選作崎嶇。

鄒湛傳初湛嘗見一人案通志見上有夢字

李充傳資生既廣羣塗思通刊本塗訛盜據毛本改又仕至侍中刊本中訛郎據明監本改

袁宏傳御員者不以信誠率衆刊本誠訛哉據毛本及文選改又知能拯物愚足全生刊本拯訛極今

改又處死非難理存則易刊本存訛有據文選改又端委虎門正言彌起刊本虎沿唐諱作獸據

文選改案文選李善注引左氏傳云晏平仲端委立於虎門之外劉良注云虎門軍門也舊考證謂虎

門文選作師門誤矣又標榜風流遠期管樂刊本榜訛勝期訛明據明監本及文選改又嘗與王

珣伏滔同在溫坐刊本珣訛恂據本書王珣傳及通志改

羅含傳伐木爲牀織葦爲席刊本牀訛材又有一白雀棲集堂序刊本白訛百並據通志改

顧愷之傳使如輕雲之蔽月刊本月訛日據毛本及通志改又玄乃發其廚後竊取畫而緘閉如舊刊

本閉訛門據通志改

卷九十三

楊文宗傳武元皇后父也刊本武元二字互倒據本書后妃傳改

褚爽傳爽子秀之淡之裕之刊本淡訛炎裕訛喻據通志及宋書南史改

卷九十四

孫登傳嘗住宜陽山刊本住訛往據毛本及通志改

董京傳得殘碎繪絮結以自覆。刊本繪訛繪。據明監本毛本及通志改。
張忠傳其居依崇巖。鑿地爲窟室。刊本地訛池。據通志及十六國春秋改。
龔玄之傳弟子元嘉亦有德操。案嘉毛本作壽。
陶潛傳乃遣其故人龐通之等齋酒。刊本龐訛寵。據通志及宋書南史改。

卷九十五

戴洋傳嘗有人乘馬東行。過老君祠而不下馬。刊本脫祠字。據通志增。
又天示有信。災發東房。刊本發訛廢。據明監本及通志改。

韓友傳此間血覆地。寧可復住。刊本住訛往。今改。

隗炤傳却後五年春。有詔使來頓此亭。刊本脫使字。據通志增。

佛圖澄傳戊申歲禍亂漸萌。刊本申訛寅。據毛本及通志十六國春秋改。

孟欽傳或前有谿澗不得過。刊本脫有字。據通志及十六國春秋增。

鳩摩羅什傳及陰陽星算莫不畢盡。刊本畢訛必。今改。

卷九十七

吐谷渾傳乖別甚易。當去汝於萬里之外矣。刊本易訛異。據通志改。

匈奴傳居于太原故茲氏縣。刊本茲訛茲。據毛本及通志改。
又車廬什物不可勝紀。刊本廬訛驢。據毛

本改

卷九十八

王敦傳以義陽太守任愔督沔北諸軍事刊本沔訛河又多樹私黨莫非同惡刊本非訛能並據通志改
又當與宿衛同列三番刊本列訛例據毛本改 又自言知擊鼓因振袖揚袍刊本袍訛袍據通志改

桓溫傳使會稽王昱會溫于涂中刊本涂訛徐據通鑑及通志改

卷九十九

桓玄傳詔以玄都督荆司雍秦梁益寧七州刊本司訛襄據通鑑及通志改 又衡陽有雌雞化為雄八
十日而冠綏具刊本綏訛萎據通志改 又廣武將軍唐興斬振及僞輔國將軍桓珍毅於臨漳刊本
漳訛章據地理志及毛本改

卷一百

張昌傳昌遣其將軍黃林爲大都督率二萬人向豫州刊本率訛卒據毛本改
陳敏傳以郡廉吏補尚書倉部命史刊本郡訛部據通志改
祖約傳其將牽騰率衆出降刊本騰訛滕據通鑑通志改
譙縱傳據聞縱反自略城步還成都刊本略訛洛據本書毛璩傳及通鑑改

卷一百一

劉元海載記。左部居太原茲氏。刊本茲訛泫。據文獻通考改。又上可成漢高之業。下不失爲魏武。刊本武訛氏。據十六國春秋改。又氏曾大單于徵。案通鑑氏曾大單于徵。胡三省注曰。當時會長皆謂之大單于。此衍于字。

卷一百二

劉聰載記。王彌爲大將軍。封齊公。尋而石勒等殺彌于己吾。刊本吾訛營。據通鑑通志改。又推疋爲平西將軍。刊本西訛南。據通鑑通志十六國春秋改。又進封晉王。食五郡。刊本郡訛都。據通志十六國春秋改。

卷一百三

劉曜載記。曜遣其車騎劉雅。刊本遣訛遷。據毛本及通志改。

卷一百四

石勒載記上。濮陽太守苟晞。刊本濮訛漢。據通志及十六國春秋改。又王俊使其將祁弘帥先卑段務塵等十餘萬騎討勒。刊本段訛沒。據通志改。又案通鑑及十六國春秋段務下有勿字。又勒出成臯關。刊本出訛至。據通鑑通志及十六國春秋改。又詭請王彌燕子己吾。刊本吾訛營。據通鑑通志改。又焚燒浚宮殿。刊本浚訛晉。據毛本及通志改。又穀二升直銀一斤。刊本一訛二。據通志及十六

國春秋改。又揚聲將歸河北。平等以爲信。然刊本脫平字。據通鑑通志及十六國春秋增。又贈平南將軍。刊本平南二字互倒。據通志及十六國春秋改。又劉曜自長安屯于蒲坂。刊本坂訛陂。據明監本改。又明出戰。勒擊敗之。刊本敗訛攻。據明監本及毛本改。

卷一百五

石勒載記下。石堪石聰等各以精騎八千自城西而北。刊本脫自字。又鄉當患輔幼主之日。不得獨擅帝舅之權故耳。刊本患訛忠。並據毛本及通志十六國春秋改。

卷一百六

石季龍載記上。郎闔爲光祿大夫。刊本闔訛閻。據通志及十六國春秋改。又若伏重軍以要之。可以得志。刊本重訛衆。據明監本及毛本改。又置高一丈七尺。案置通志作置。又石宣及諸公。又私令采發者亦垂一萬。刊本又訛及。據明監本及毛本改。

卷一百七

石季龍載記下。光祿石岳。刊本岳訛行。據毛本及通志十六國春秋改。

卷一百八

慕容廆載記。廆刑政脩明。虛懷引納。刊本納訛統。據毛本改。又自平郭趣柏林爲左翼。刊本郭訛國。據通志及十六國春秋改。

卷一百九

慕容皝載記。司馬修壽等討之。刊本壽訛燾。據通鑑通志十六國春秋改。又乃遣其長史劉祥獻捷京師。案祥毛本及通鑑綱目作翔。又溝洫漑灌有益官私。刊本私訛司。據通鑑及十六國春秋改。

卷一百一十

慕容暉載記。以其左中郎慕容筑爲假節征虜將軍。刊本左下行右字。據通志十六國春秋刪。又夫建德者。必以終善爲名。佐命者。則以功成爲效。刊本佐訛位。據毛本改。又暉鍾律郎敦欽。刊本鍾訛鎮。據毛本改。又攻其遼東太守韓稠于平州。案州毛本作川。皇甫真載記。領護匈奴中郎將。刊本領訛鎮。據通志改。

卷一百一十三

苻堅載記。上俄而梁熙王統等自清石津攻其將梁粲于河會城。案清毛本作青下同。

卷一百一十五

苻丕載記。重合侯苻謨爲征西將軍。刊本脫苻字。據毛本及通志增。

卷一百一十六

姚弋仲載記。仲率部衆數萬遷于清河。刊本部訛步。據通志及十六國春秋改。

卷一百一十七

姚興載記上于是其太尉趙公旻等刊本公旻二字互倒。又遣其兼大鴻臚梁斐刊本斐訛斐。又幸皇鑿降眷純風遠被刊本眷訛春並據通志及十六國春秋改。

卷一百十八

姚興載記下以侍御史廉桃生爲證刊本桃訛姚據明監本及毛本改。又乃以嬖人尹冲爲給事黃門侍郎刊本給訛結侍訛任今並改。

尹緯載記卿實不及胡爲不知也刊本脫知字據通志及十六國春秋增。

卷一百二十

李特載記使物情知所歸則天下可定刊本知訛之據毛本及通志十六國春秋改。又斬特及李輔李遠皆焚尸傳首洛陽刊本尸訛尺據毛本改。

卷一百二十一

李雄載記特起兵于蜀刊本于訛爲據通志及十六國春秋改。又東征任礪刊本礪訛回據本書音義及通志改。

卷一百二十二

呂光載記太廟新成刊本成訛城據毛本改。

呂隆載記武旅十萬謀臣盈朝刊本脫謀臣二字據毛本及通志十六國春秋增。

卷一百二十三

慕容垂載記。臣奉詔北巡。受制長樂。刊本奉訛舉。據通志及十六國春秋改。又聽終三年之禮。則四方知化。刊本知訛之。據毛本及通志改。又翟遼死。子釗代立。攻逼鄴城。慕容農擊走之。刊本走訛定。據通志及十六國春秋改。又農楷分爲二翼。刊本爲二二字互倒。據毛本及通志十六國春秋改。又垂至上谷之沮陽。刊本沮訛俎。據本書地理志改。

卷一百二十四

慕容盛載記。于是內外帖然。刊本帖訛恬。又謙抑自卑。不稱尊號。刊本抑訛楫。並據通志改。

卷一百二十五

乞伏乾歸載記。于是以平北韋乾爲長史。刊本平北二字互倒。據毛本改。

乞伏熾盤載記。自西平逃而降興。刊本西訛南。據上乾歸傳改。

馮跋載記。于是以太元二十年乃僭稱天王于昌黎。案通志太元二十年作義熙五年。通鑑亦稱義熙五年。馮跋即位。本卷下文義熙六年跋下書云云。卽跋即位之明年。此云太元二十年。誤。

卷一百二十六

羌髮烏孤載記。陰訓郭倖西州之德望。刊本訓訛順。據毛本及通志十六國春秋改。

卷一百二十八

慕容超載記。鎮出謂韓諱曰。刊本諱訛謨。據毛本及通志改。

卷一百二十九

沮渠蒙遜載記。改元永安。案永安。白帖作永和。又恪勤官次。所以緝熙庶政。刊本政訛正。據毛本改。

卷一百三十

赫連勃勃載記。勃勃字屈子。刊本子訛子。據魏書及十六國春秋改。

音義卷上

帝紀第一。不敷悲反。刊本闕敷愆二字。據廣韻補。

帝紀第三。渦口。說文。渦水受淮陽扶溝浪蕩渠東入淮。刊本受訛出淮下衍南字。扶訛浮。據說文及漢書

地理志刪改。又青絲紉。丈忍反。刊本丈訛文。據類篇改。

帝紀第五。喁喁魚口。上見。刊本魚訛衆。據集韻改。

志第二。壅沮下。七余反。刊本七余二字互倒。今改。

志第四。令支下。巨支反。刊本巨訛三。據陳仁錫本改。

志第五。凜匹備反。刊本匹訛片。今改。又含涯。刊本含訛舍。據本書地理志改。

志第六。彼義反。刊本彼訛徐。據廣韻改。

志第十五。相繆。武彪反。刊本武訛或。今改。

志第十六催刊本催訛僮據本書食貨志改。

志第十七掛古買反刊本古買訛掛負今改。又寢作任反刊本任訛在今改。

志第十八鷄刊本鷄訛鷓據明監本音義改。

志第二十朴普木反刊本普訛昔今改。又鈷鑽下字亂反所以穿也刊本子訛字所以訛片反據說文改。

音義卷中

列傳第六頽仰說文頽仰字如此。斐古反。又俗作俛。刊本訛作頽仰。斐古反。又仰字如此。俗作俛。今據說文改。

列傳第九緝古恒反刊本恒訛亘今改。

列傳第十蓼莪上音力竹反刊本竹訛救今改。

列傳第十一憮音武刊本武訛至。又纒繫下乙減反刊本乙減訛乞咸今並改。

列傳第二十踞齧案踞踢也刊本踢訛踞據顏師古注改。

列傳第二十五磔下苦蓋反刊本脫蓋字據廣韻增。

列傳第三十一憚於粉反刊本粉訛粹。又碌盧谷反刊本盧谷訛初危今並改。

列傳第三十六圻渠希反刊本希訛布今改。

列傳第三十七。衍。胡郎反。刊本郎訛朗。今改。

音義卷下

列傳第四十四。孱。士限反。刊本土訛古。今改。

列傳第四十五。瘞。於例反。刊本例訛列。今改。


列傳第五十七。恰。苦洽反。刊本洽訛治。據廣韻改。

列傳第六十二。泓。瞻。刊本瞻訛噲。今改。

列傳第六十八。齶。刊本齶訛齶。今改。

列傳第六十九。嫻。媪。下。烏浩反。刊本脫反字。今增。

列傳第七十。沮。嗣。下。子六反。刊本子訛丁。今改。



著者 (清) 王太岳撰書碼 082·47
Author Call No. 7437
書名 四庫全書考證：(十) 10
Title

登錄號碼 007480
Accession No.

月日 Date	借閱者 Borrower's Name	月日 Date	借閱者 Borrower's Name

國立中央圖書館

書碼 082·47 登錄號碼 007480
7437
10

國立中央圖書館



0007480



.47
7

籍